

## ROMANS

<sup>1</sup> Atha Paul-ala, Jesua Kristaka urkapunhapunhala, pepa nhanha rrakangkarrurna yairnama. Altjirralla kunha yinganha urrarakala apostle ekura nitjika. Era turta yinganha turnakala relha ntjarranha Yia Marra ekuranha kaltjinthitjika.

<sup>2</sup> Yia Marra nhanhiperra Altjirralla Abrahamaka ramarama imankangatjina ilentjika, urrpia ekuranha ntjarrarlarlanga. Urrpia etna turta Yia Marra erinha intalhelaka. Era Altjirraka Angkatja Imankinyala intama. <sup>3</sup> Yia Marra nahanala nurnanha Altjirraka 'Liriperra ilama. Era David-aka ramarama naka. <sup>4</sup> Era turta Altjirraka 'Lira ekarlta namantema. Nhanha Enka Alkngaltarala nurnanha ntelaka erinha errilknga ntjaranga kamalhelamala. Jesua nhanha era Krista turta nama, Ingkarta nurnaka.

<sup>5</sup> Ekurarlarlanga Altjirranha apostle nurnaka ngwanga ntelalhaka. Ekurarlarlanga turta era nurnanha urraraka, urrpia turtantama yairnaka Relha Lorinya ntjarrurna, etnala pmararpaninhala namanga. Era nurnanha yairnaka nurna etnanha kaltjinthitjika etna Kristaka arratja kangkwerritjika, erinha tnakamala. <sup>6</sup> Rrangkarrantama relha worla ekura namantema, worla nhanga Jesuala urrarakala ekuriltja nitjika.

<sup>7</sup> Atha pepa nhanha yairnama Rome-arinya rrakangkarrurna. Altjirranha rrakangkarra

kangkama. Era turta rrankarranha ur-raraka relha alkngaltara ekuriltja nitjika. Altjirra Kaarta nurnaka, Ingkarta Jesua Kristanha turta, rrankarra ngwanga ntelalhama, rilhera turta.

*Paul-anha ilalhaka era errarerramanga etnakurna lhitjika*

<sup>8</sup> Arrkurlakimparra atha Altjirra nukanha dangkilama, Jesua Kristarlarlanga, rrankarra ingkarakaka. Atha erinha dangkilama, pmararrpaninhala relha ntjarra ilarramanga rrankarra Jesuanha tnakamanga. <sup>9</sup> Yinga Altjirra kutatha urrkurrkintja nama, relha ntjarranha Yia Marra 'Lira ekuranhiperra kaltjinthamala. Altjirranhantama kaltja yinga nhanha nthurpa angkamanga. <sup>10</sup> Yingatata kutatha rrankarra ilpangkama, yinga Altjirurna ingkamalanga. Yinga turta ekurna ingkama rrankarrurna lhitjika, nhanha paka ekuralela marra namanga.

<sup>11</sup> Yinga errarerramakwia rrankarranha aritjika, atha rrankarranha ekarltilitjinanga, rrankarranha Altjirra angkatja ilamala. <sup>12</sup> Lakinhatitja. Nurna kapanha ekarltilaritjinanga. Rrankarra ekarlterritjinanga rrankarra wumalanga, atha Jesuanha ekarlta kuta tnakamanga. Yinga turta ekarlterritjinanga atha wumalanga rrankarra Jesuanha ekarlta kuta tnakamanga.

<sup>13</sup> Tjina ntjarrai, rrankarra kaltja nitjika, yinga ntjarraranga antja nakala rrankarrurna lhitjika. Altjirrala pula

yinganha lyartalpula parrakarrpala. Yingataka antja naka rrakangkarranga turta relha urrputja Jesuurna rretjingitjika, athala Relha Lorinya arrpunha ntjarranha Jesuurna rretjingakala ngerra.

<sup>14</sup> Arai, nukathaka nama Yia Marra erinha relha ingkarrakanha ilitjika, inangkarla ntjar-ranha, alkumpa ntjarranha, kaltja ntjarranha, kornakorna ntjarranha turta. <sup>15</sup> Lakinhang a yinga thakerrama rrangkarranha turta Yia Marra erinha ilitjika. Rrangkarranha purrama, rrangkarrala Rome-ala namanga.

*Altjirranga urlarra relha era arratja nama, erala Yia Marra erinha tnakama*

<sup>16</sup> Yinga itja Yia Marra ekura errakarrerrama. Yia Marra ekurarlarlanga Altjirranha ekarlta ntelalhama relhanha tangkalhelitjika, etna Yia Marra erinha tnakamanga. Yia Marra era relha Jew ntjarrakarrka nama, kurunga Relha Lorinya ntjarraka turta. <sup>17</sup> Arai, Yia Marra era kunha relhanha ilama era Altjirranga urlarra arratja namanga, era Jesuanha tnakamanga. Nhang a Altjirraka Angkatja Imankinyala ilama, “Relha erala Altjirranha tnakama, era kala Altjirranga urlarra arratjerrakala nama.”

*Altjirranha aa kngarra ntelalhama relha ingkarrakaka, etnala itja arratja ntelalhamanga*

<sup>18</sup> Relha arrpunha ntjarrala Altjirranha ar-rampowuma, korna ntelalhama turta. Lak-inha ntelalhamala, etna relha arrpunha ntjar-ranha parrama ngerra, Altjirranha lhangkar-itjika. Alkirangatjina, Altjirranha kala relha

nhanha ntjarraka aa kngarra ntelalhama. <sup>19</sup> Era etnanha rrarrathala tuma, etna ekuriperra itja arratja eterramanga, era etnaka ntelalhakalan-gatanya. <sup>20</sup> Nthurra relhala yarna Altjirranha arama. Altjirranha pula ntelalhaka era ekarita inthorra namanga, makalaria inthorra turta, alha nhanha, alkira etnanha turta arrpmar-namala. Lakinhangha relha nhanha etna itja Altjirra kotna nama. <sup>21</sup> Etna Altjirra kala kaltja nama, etna pula erinha itja tnantjama, dangkilama paka, nhanha etnakathaka naman-gatanya. Lakinhangha Altjirrala etarlingetarla etnakanha parrpartilaka, eterrintja etnakanha marntilaka turta. <sup>22</sup> Etnantama tnakalhama etna kula inangkarla namanga, etna pula irtirta wara nama. <sup>23</sup> Altjirra kngaanintja erinha ipmintja impumala, etna irna relhala mpaarakalakatitjan-tama urrkurrkintja nama, irna relha ngerraka, thepa ngerraka, tnontha ngerraka, lhungkultja ngerraka turta.

<sup>24</sup> Lakinhangha Altjirrala etnanha kala ipmintja impuma lherrintja korna etnakanhaka kangkw-erritjika, korna mpaaritjika turta. <sup>25</sup> Etna itja Altjirriperra arratja etarlarama. Etna Altjirriperra orrtjerramatitja. Etnantama irnaka, tnonthaka turta urrkurrkintja nama. Nhangha irnalka Altjir-rala arrpmarnakalakakwia. Etna pula Altjirra itjala urrkurrkintja nama. Arai, relhala kunha Altjirranha ngampakala tnantjitjika. Amen.

<sup>26</sup> Lakinhangha Altjirrala etnanha kala ipmintja impuma lherrintja korna arrpunhaka turtan-tama kangkwerritjika. Marla etnakanha itja artwalela intama, marla arrpunhalela pula.

<sup>27</sup> Artwa etnakanha turta itja marlalela intama, artwa arrpunhalela pula. Etna lakinha ntelalhamanga, Altjirralla etnanha rrarrathala tutjina.

<sup>28</sup> Etna itja antja namanga Altjirriperra arratja etarlaritjika, Altjirralla etnanha kala ipmintja impuma etnarrpa paalakarla eterralanitjika, paala turtantama ntelalhitjika. <sup>29</sup> Etnantama kornakanta antja nama, thakerrama turta. Etna relha arrpunhaka antjakunyerrama. Etna relha arrpunhanha errilnga tuma. Etna relha arrpunhanha orrtjapepilama. Etna relha arrpunhaka alkngarnterrama. Etna relha arrpunhanha iltama. Etna relha arrpunhiperra lhanma angkama, <sup>30</sup> lhurkurta angkama turta. Etna Altjirraka antjakunya nama. Etna Altjirraka tjurnalhama, ekura irrpaltherrama turta. Etna tnakalhama. Etna kala antjerrama korna wara ntelalhitjika. Etna itja kaartaka miaka paka kangkwerrama. <sup>31</sup> Etna irtirerrama, etna ortjerrama turta. Etna itja relha arrpunhaka konyerrama paka, etna turta itja relha arrpunhanha makarama. <sup>32</sup> Etna kala kaltja Altjirranha angkakala, era relha korna lakinha imilitjinala. Etna pula kunpa kuta korna ntelalhama. Etna kangkama turta arrpunha ntjarra etnakalela nyinterramanga korna ntelalhitjika.

## 2

*Altjirralla relha ingkarrakanha arratja tjiperawutjina*

<sup>1</sup> Relhai, unta yarna tangkalhelalhama relha arrpunhanha ilparnamala, unta era ngerra

inthorra ntelalhamanga warta. Erinha imilamala, unta kala imilalhamantema. <sup>2</sup> Nurna kala kaltja Altjirrala relha korna ntjarranha arratja kuta tjiperrawumanga. <sup>3</sup> Iwunhangantama unta etarlarama Altjirrala relha korna arrpunhanhanta imilitjinala, kanha nganha itjala? Unta kunha korna ntelalhama, era ngerra. <sup>4</sup> Thunga unta etarlarama Altjirranha wara kangkintja ntelalhamanga, montjamontja turta. Unta itjala kaltja? Altjirranha kunha unkwanga montjamontja ntelalhama, nganha topalhelitjika.

<sup>5</sup> Unta pula arrthata kuta namanga, marntilparla turta, Altjirrala nganha kngarra inthorra rrarrathala tutjina, era anma pitjimalanga relha ingkarrakanha arratja tjiperrawutjika. <sup>6</sup> Arla nhanha ekurala era relha ingkarrakanha kwartiwutjina etna ntelalhakala ngerra. <sup>7</sup> Arai, relha arrpunha kangkintja ntelalhama. Era antja nama Altjirrala erinha tnantjitjika, erinha ngampakala etatha tnyinitjika turta. Relha nhanha erinha Altjirrala ngampakala etatha tnyinitjina. <sup>8</sup> Kanha relha arrpunha itjala kangkintja ntelalhama. Era turta itja antja nama Altjirraaka turnintjaka kangkwerritjika, korna kuta pula ntelalhitjika. Relha nhanha erinha Altjirrala rrarrathala tutjinala. <sup>9</sup> Arai, relha etnala korna ntelalhama, etnanha Altjirrala nakapakarilitjina, rrukunhakunhilitjina turta. Jew ntjarranhakimparra, kurunga Relha Lorinya ntjarranha turta. <sup>10</sup> Kanha relha etnala relha arrpunhaka kangkintja ntelalhama, etnanha Altjirrala tnantjitjina, etnaka rilhera turta ntelalhitjina. Jew ntjarrakakimparra, kurunga Relha Lorinya

ntjarraka turta. <sup>11</sup> Altjirrara kunha relha ingkarrakanha loala kuta tjiperrawutjina.

<sup>12</sup> Relha Lorinya ntjarrala itja Altjirraka turnintja tnyinama, turnintja nhanga Altjirrallala Moses-anha ilakala. Etna pula korna ntelalhamanga, Altjirrara etnanha kalantemala imilitjina. Relha Jew ntjarrala pula Altjirraka turnintja tnyinamala. Etna pula Altjirraka turnintjaka itja kangkwerramanga, Altjirrara etnanha imilitjinantema. <sup>13</sup> Arai, relha etnala Altjirraka turnintja wara wurlanama, etna itja Altjirranga urlarra arratja nama. Relha lenha ntjarranta ekuranga urlarra arratja nama, etnala turnintja ekuranhaka kangkwerramanga.

<sup>14</sup> Relha Lorinya ntjarrala itja Altjirraka turnintja tnyinama, turnintja nhanga erala Moses-anha ilakala. Etna pula arrpunharanga ntelalhama Altjirrara relhanha turnakala ngerra. Lakinha etna ntelalhama, etna turta Altjirraka turnintjaka kaltja namanga ngerra, <sup>15</sup> Altjirraka turnintja arrpunha turta kala eterrintja etnakanhala intamanga. Etakintja etnakanhalantama etnanha arrpunharanga ilparnitjina, arrpunharanga ilitjina etna arratja ntelalhakala, <sup>16</sup> Altjirrara relha ingkarrakanha tjiperrawumalanga Krista Jesuarlarlanga, Yia Marra nukanhalkura. Altjirrara relha ingkarrakanha tjiperrawumalanga, era relhaka eterrintjalka tjiperrawutjina, eterrintja nhanga relhalala lauwerkala.

*Relha Jew ntjarra Altjirraka turnintjaka kangkwerritjikanharrpala*

17 Yinga nhanha relha Jew rrankangkar-rurnantama angkama. Rrangkarra angkama rrankarra relha Jew namanga. Rrangkarrantama tnoatnoa nama rrankarra Altjirraka turnintja tnyinamanga. Rrangkarra turta tnakalhama Altjirranha tjina rrankangkarra namanga. 18 Rrangkarra angkama rrankarra Altjirraka turnintjaka kaltja namanga, kaltja turta namanga arratja ntelalhitjika. 19 Rrangkarra angkama rrankarra relha panga ntjarranha irrpalthala rretjingamanga, rrankarra turta parrtja ngerra namanga relha thapathapala ngerra namala ntjarraka. 20 Rrangkarra angkama rrankarra relha irtirta ntjarranha irrpalthala kaltjinthamanga, kurrkunta ntjarranha turta. Rrangkarra turta tnakalhama rrankarra ingkarrakaka kaltja namanga, rrankarra Altjirraka Angkatja Imankinya erinha tnyinamanga.

21 Arai, rrankarra arrpunha ntjarranha kaltjinthama. Kanha rrankarrarrpa itjala kaltjerrama. Rrangkarra arrpunha ntjarranha kaltjinthama, "Itja nyilkgala initjika." Kanha rrankarra nyilkgala inamala. 22 Rrangkarra arrpunha ntjarranha ilama, "Itja ntaiyawutjika." Kanha rrankarra ntaiyawumala. Rrangkarra orrtja altjirraka antjakunya inthorra ntelalhama. Kanha rrankarra orrtja altjirraka temple-anga yultha nyilkgala inamala. 23 Rrangkarra tnakalhama rrankarra Altjirraka turnintjakarta namanga. Rrangkarra pula Altjirranha arrampowumala rrankarra turnintja ekuranhaka itja kangkwerramanga. 24 Nhanga



Altjirraka Angkatja Imankinyala ilama, “Jew rrakangkarranga arrkngala, Relha Lorinya ntjarrala Altjirranha arrampowuma.”

<sup>25</sup> Relha Jew ntjarrai, artwilintja kunha tji-parra nama, rrankarra Altjirraka turnintjaka kangkwerramanga. Rrankarra pula Altjirraka turnintjaka itja kangkwerramanga, artwilintja palkala wara nama. <sup>26</sup> Relha Lorinya ntjarranha itja artwilaka. Relha Lorinya etna pula Altjirraka turnintjaka kangkwerramanga, etna Altjirranga urlarra artwer-rakala ngerra nama. <sup>27</sup> Lakinhanganga Relha Lorinya ntjarrala relha Jew rrankarranha ilpar-nitjina. Iwunhanganga? Etna Altjirraka turnintjaka kangkwerramanga, etnanha itja artwilakalan-gatanya. Kanha rrankarra Altjirraka turn-intjakarta nama. Rrankarranha artwilakala turta. Rrankarra pula Altjirraka turnintjaka itjala kangkwerrama.

<sup>28</sup> Ngunhantama relha Jew inthorra nama? Itja relha era, erinhala Jew ngerra arama, erinha turtala artwilakala. <sup>29</sup> Relha era pula Jew inthorra nama, erinhala Altjirraka Enkala kaltjinthakala Altjirraka arratja kangkwerritjika. Relha nhanha erinha Altjirrala tnantjitjina.

### 3

<sup>1</sup> Thunga relha arrpunhala pmarrama. Altjir-ranga urlarra relha Jew ntjarra tjiparralkurama nama, relha arrpunha ntjarrangatjina? Altjir-ranga urlarra nhanha tjiparrama nama etna

worra etnakanha artwilamanga? <sup>2</sup> Awa, tji-paranta kuta. Etnanhakimparra kunha Altjirrala angkatja ekuranha ilakala, tnyinitjika.

<sup>3</sup> Nthurrpa, etnakanga arrpunha ntjarra Altjir-raka angkatjaka itja kangkwerraka. Nthakinhan-tama? Etna itja kangkwerrakalanga, Altjir-raka lhelintja ipmintjerritjina? <sup>4</sup> Itja kuta. Relha ingkarraka paka kekarta lhamanga, Altjir-raka lhelintja itja kuta ipmintjerritjina. Nhang-a Altjir-raka Angkatja Imankinyala ilama,

“Altjirrai, unta relhalela iwurramalanga, relha ingkarrakala wutjina unta arratja angkamanga, arratja tjiperrawumanga turta.”

<sup>5</sup> Thunga relha Jew nyinta lakinha angkama. Arai, relha Jew nurna korna ntelalhamanga, relha arrpunha ntjarrala arama Altjirranha ar-ratja kuta namanga. Lakinhang-a Altjirrala nur-nanhanha kala rrarrathala tutjala impeikanhanta. <sup>6</sup> Nhanhataka eterrintja paala. Altjirrala paka Jew nurnanhanha impumanga, nthakinhantama era relha arrpunha ntjarranhanha arratja tjiper-rawutjina?

<sup>7</sup> Thunga relha Jew arrpunha lakinhala angkama. Arai, yinga korna ntelalhamanga, relha arrpunha ntjarrala kathalkura arama Altjirranhanha makalaria namanga. Iwunhangantama Altjirrala yinganhanha imilama? <sup>8</sup> Eterrintja nhanhanha paka arratja namanga, kala lakinhanta angkai, “Mpa, nurna korna ntelalhai, relha ntjarrala Altjirranhanha tnantjitjinanga.” Relha arrpunha ntjarrala yinganhanha ilparnaka,

yinga kula lakinha angkakala. Altjirralla kala relha nhanha etnanha imilitjina.

*Itja relha nyinta arratja nama.*

<sup>9</sup> Nthakinbantama? Relha Jew nurna, nurnala Altjirraka turnintjakarta namanga, nurna paka relha arrpunha ntjarranga marralkurama nama? Itja kuta. Atha nhangarrangkaranhanha ilakala ngerra, nurna ingkarraka, relha Jew ntjarra, Relha Lorinya ntjarra turta korrarintja nama. <sup>10</sup> Nhangarrangkaranhanha ilakala ngerra, nurna ingkarraka, relha Jew ntjarra, Relha Lorinya ntjarra turta korrarintja nama. <sup>10</sup> Nhangarrangkaranhanha ilakala ngerra, nurna ingkarraka, relha Jew ntjarra, Relha Lorinya ntjarra turta korrarintja nama.

“Itja relha nyinta paka Altjirranga urlarra arratja nama,

<sup>11</sup> Altjirriperra paka arratja etarlarama, Altjirrallala ilkwatharra nitjika paka antja nama.

<sup>12</sup> Relha ingkarraka kunha Altjirranga ntjuma lhakala, etna ingkarraka paalakarlerakala turta. Itja nyinta paka kangkintja ntelalhama.

<sup>13</sup> Antja etnakanhanha wolknaga altjurilakala ngerra nama.

Etna orrtjerrama.

Etna arrpunhanha ntjarranhanha errilknaga tuma, nhangarrangkaranhanha ilakala ngerra, nurna ingkarraka, relha Jew ntjarra, Relha Lorinya ntjarra turta korrarintja nama.

apmaka arrangkulthalala relhanhanha errilknaga tumanga ngerra.

<sup>14</sup> Etna relhanhanha kornilama, iltama turta.

<sup>15</sup> Etna relhanhanha errilknaga tutjika thakerrama.

<sup>16</sup> Etna relhanhanha nakapakarlilama.

<sup>17</sup> Etna rilhera nitjika kotna.

<sup>18</sup> Etna Altjirranga treritjikanhanha, itja kuta.”

<sup>19</sup> Nurna kala kaltja, relha etnala Altjirraka turnintjakarta namanga, etnakathaka nama Altjirraka turnintjaka kangkwerritjika. Etna pula turnintja ekuranhaka itja kangkwerramanga, etna yarna ilalhama etna arratja namanga. Altjirralla etnanha ingkarraka ilparnamanta kuta. <sup>20</sup> Arai, relha nyinta yarna Altjirranga urlarra arratjerrama, Altjirraka turnintjaka kangkwerramala kula. Altjirraka turnintjalataka relhaka korna kathilamanta.

*Altjirralla ilama relha etna ekuranga urlarra arratja nama, etnala Jesuanha tnakama*

<sup>21</sup> Nthakinbantama relha Altjirranga urlarra arratja namara? Arai, Altjirraka Angkatja Imankinyala nurnanha nhanha kala ilaka. Altjirra erarrpa turta nurnanha nhanha lyarta ilama. <sup>22</sup> Relha ntjarra kunha Altjirranga urlarra arratja nama, etna Jesua Kristanha tnakamanga. Angkatja nhanha relha Jew ntjarraka nama, Relha Lorinya ntjarraka turta. Loala kuta. <sup>23</sup> Arai, relha ingkarraka kunha Altjirranga urlarra relha kornarintja nama, etna ingkar-raka turnintja ekuranhaka itja arratja kangkwerrakalanga. <sup>24</sup> Altjirralla pula etnanha ilama, etna ekuranga urlarra arratjantama nama, Krista Jesuanha etnakakwia ilukalanga. Lenhakakwianta Altjirranha etnaka ngwanga ntelalhama. <sup>25</sup> Imanka Altjirralla relha ntjarranha turnaka tnontha errilknga tutjika. Etna turtantama erinha tnonthaka alhwa nthitjika, tjauwerrilya ngerra, korna etnanhakakwia. Lakinha ngerra

Altjirrala Krista Jesuanhantama relhaka lantbaka errilknga tutjika, relhaka kornakakwia. Lyartangantama, relhala Krista Jesuanha tnakamanga, Altjirrala korna etnakanha iwuma. Era turta etnanha marrilama Krista Jesuaka alhwala. Krista Jesuanha relha ntjarraka lantbamala, etna erinha tjauwerrilya ngerra errilknga tutjika, Altjirrala relha ingkarrakanha ntelaka, era arratja kuta namanga. Arai, imanka, konyerramala, era relhaka korna makarakarrka. <sup>26</sup> Lyarta pula, Kristanha relha kornakakwia ilutjika lantbamala, era ntelaka era arratja kuta namanga. Era turtantama relha ntjarranha ilama etna ekuranga urlarra arratja namanga, etna Jesuanha tnakamanga.

<sup>27</sup> Lakinhanganya relha yarna wotha Altjirranganya urlarra tnakalhama. Iwunhanganya? Era yarna warta Altjirranganya urlarra arratjerramanganya turnintjaka kangkwerramala, Jesuanha tnakamalanta wara pula. <sup>28</sup> Nurna kunha kaltja relha Altjirranganya urlarra arratja nama, era Jesuanha tnakamanganya wara, itja era turnintjaka kangkwerramanganya. <sup>29</sup> Altjirranha kunha relha ingkarakaka Altjirra nama. Relha Jew ntjarraka, Relha Lorinya ntjarraka turta. <sup>30</sup> Erantama relha Jew ntjarranha ilama etna ekuranga urlarra arratja namanganya etna Jesuanha tnakamanganya. Era turta Relha Lorinya ntjarranha ilama etna ekuranga urlarra arratja namanganya, etna Jesuanha tnakamanganya. <sup>31</sup> Nurna rrangkarranha lakinha ilamala, nurna paka Altjirrakanya turnintjanya ipmintjanya iwumamanya? Itja kuta. Nurna turnintjanya etnanha ekarltilamatitjanya.

## 4

*Abraham-ala Altjirranha tnakaka. Lakin-hanga Altjirrala erinha ilaka, “Unta nukanga urlarra arratja nama.”*

<sup>1</sup> Yinga kaarta nurnakanha Abraham-iperrantama angkama. Iwunhangama Altjirrala erinha ilaka era ekuranga urlarra arratja namanga? <sup>2</sup> Arai, Altjirrala paka erinha lakinha ilakalanga era turnintjaka arratja kangkwerrakalanga, ekurathaka namara tnakalhitjika. Abraham-anha pula itja Altjirringa urlarra tnakalhaka. <sup>3</sup> Iwunhanga? Altjirraka Angkatja Imankinyala nurnanha ilama. “Abraham-ala Altjirranha tnakaka. Nhanhakakwa Altjirrala erinha ilaka: Unta nukanga urlarra arratja nama.”

<sup>4</sup> Arai, thunga relha, relha arrpunhaka urrkapuma. Relha erantama erinha money nthama. Money nhanha itja yearriperra nama, wages pula. <sup>5</sup> Kanha Altjirralela lakinhala nama. Thunga relha itja turnintjaka arratja kangkwerraka, era pula tnakama Altjirrala relha kornarintjanha irrpalthala tangkalhelama. Relha nhanha erinha Altjirrala ilama era ekuranga urlarra arratja namanga, era erinha tnakakalanga. <sup>6</sup> Lakinha David-anha turta angkamantema. Era angkama relha era arrkana nama, erinhala Altjirrala ilakala era ekuranga urlarra arratja namanga, era itja arratja kangkwerrakalangatanya.

<sup>7</sup> “Relha etna arrkana nama, korna etnakanhala Altjirrala iwukala,

paala etnakanha turtala Altjirrala korltakala.

<sup>8</sup> Relha era arrkana nama, erinhala Inkartala itja ilparnama.”

<sup>9</sup> Nthakinhantama? Relha artwerrakala etnakanta Altjirranha kangkama? Itja inthorra. Relha artwerritjikanha etnaka turta era kangkaman-tema. Atha nhanga rrangkarran-  
ha ilaka, “Abraham-ala Altjirranha tnakaka. N-  
hanhakakawia Altjirrala erinha ilaka: Unta nukanga urlarra arratja nama.” <sup>10</sup> Ilangarama Altjirrala Abraham-anha lakinha ilaka? Abraham-anha kala artwerrakalanga? Thunga arrkurla kuta? Arai, Altjirrala erinha arrkurla kuta lakinha ilaka. <sup>11</sup> Era ingkarnantantama artwerraka, era kala Altjirringa urlarra arratja namanga, era Altjirranha tnakakalanga. Artwilintja ekuran-  
tama imparra ngerra wara naka, relha ntjarra kaltja nitjinanga era Altjirringa urlarra arratja namanga. Lakinhang-  
a era kaarta ngerra nama artwilitjikanha ntjarraka, etnanhala Altjirrala ilakala etna ekuranga urlarra arratja namanga etna erinha tnakakalanga. <sup>12</sup> Era turta kaarta artwilakala ntjarraka namantema, etna paka Altjirranha tnakamanga, Abraham-alala Altjirranha tnakakala ngerra, era itjantema artwerrakalanga.

<sup>13</sup> Arai, Altjirrala Abraham-anha, annga eku-  
ranha turta lhelaka, alha nhanha etnakantama nitjinala. Altjirrala itja Abraham-anha nhanha lhelaka era turnintjaka kangkwerrakalanga. Altjirrala pula Abraham-anha nhanha lhelaka era

erinha tnakakalanga, era turtantama ekuranga urlarra arratja namanga. <sup>14</sup> Arai, Altjirraka lhelintja paka relha etnakanta namanga, etnala turnintjaka kangkwerramanga, kurunga relhala Altjirranha palkala wara tnakama. Altjirraka lhelintja turta ipmintja nama.

<sup>15</sup> Etarlarai, Altjirraka turnintjala kunha relhanha imilama. Turnintja pula itja namanga, relha yarna turnintjanga kekarta lhama.

<sup>16</sup> Lakinhanganga Altjirraka Abraham-aka annga ingkarraka kala kapanhanta lhelaka, lhelintja era ipmintjerrakitja. Abraham-aka anngakathaka naka Altjirranha kala tnakitjikanta. Lhelintja nhanha Abraham-aka annga ingkarrakaka naka. Annga lenha ntjarraka etnala Altjirraka turnintja tnyinakala. Annga lenha ntjarraka turta etnala Altjirranha tnakakala Abraham-ala ngerra. Abraham era kunha nurnaka ingkarrakaka kaartana nama. <sup>17</sup> Altjirraka Angkatja Imankinyala nhanganga ilama, “Atha nganha ingkairnaka relha worla ntjarra inthorraka kaartana nitjika.” Altjirranganga urlarra Abraham-anha kaartana nurnaka nama, nurna Altjirranha tnakamanga Abraham-ala erinha tnakakala ngerra. Abraham-ala tnakaka Altjirraka relha errilknganha wotha irpalthala etathilama. Era turta tnakaka Altjirraka kala arrpmarnama era antja namala ngerra.

<sup>18</sup> Abraham Sarah tharra kala kngarripata inthorra naka. Era yarna etarlaraka, “Nthakinhamana ilirnaka katjiana intamara?” Era pula Altjirranha ekarlta kuta tnakaka. Erantama nthurra kaartana relha worla ntjarra inthorraka nama. Nhanganga Altjirraka Angkatja Imankinyala



ilama, “Ramarama unkwanganha kunha ntjarra inthorra nitjina, nthelipura ngerra.” <sup>19</sup> Era kala ingkwa 100 years ingkwia naka, mpurrka ekura turta kala ilutjikerraka, era pula Altjirranha ekarlta kuta tnakaka. Era araka Sarah-anha turta kala kngarripata inthorra namanga. <sup>20</sup> Era pula Altjirranha itja kuta ilpoiwuka. Altjirranha tnakamala era ekarlterrakatitja. Era turtantama Altjirranha tnantjaka. <sup>21</sup> Era kala tnoatnoa inthorra naka. Era kaltja naka Altjirra lhelintja yarna ipmintjerrama. <sup>22</sup> Lakinhang Altjirrala Abraham-anha ilaka, “Unta nukanga urlarra arratja nama.” <sup>23</sup> Angkatja nhanha “Unta nukanga urlarra arratja nama,” angkatja nhanha itja Abraham-akanta naka. <sup>24</sup> Nhanha pula nurnakakwia turta intalhelakala. Nurnanha turta Altjirrala ilama, “Unta nukanga urlarra arratja nama,” nurna erinha tnakamanga. Erinha purrama, erala Jesuanha, Ingkarta nurnakanha, relha errilknga ntjarranga kamalhelakala. <sup>25</sup> Altjirrala kunha Jesuanha relha ntjarraka lanthaka, etna erinha errilknga tutjika, korna nurnakanhakakwia. Era pula erinha wotha etathilaka, nurna ekuranga urlarra arratja nitjinanga.

## 5

*Altjirrala relha tnakanhakanha ntjarranha ilaka: Rrangkarra nukanga urlarra arratja nama*

<sup>1</sup> Nurna Altjirranha urlarra kala relha arratjantama nama, nurna Altjirranha tnakakalanga. Altjirranha turtantama nurnaka rilhera ntelalhama, Ingkarta nurnaka Jesua Kristarlarlanga.

<sup>2</sup> Nurna Jesuanha tnakamanga, Kaarta era turta nurnaka ngwanga ntelalhama. Lakinhang nurna arrkana kaaralhama anma Altjirralela nitjika, pmara makalaria ekuranhala. <sup>3</sup> Nhanha turta. Nurna arrkana nama etna paka nurnanha lyarta nakapakarlilamanga. Iwunhang? Nakapakarlerramala nurna kaltjerrama Altjirrakanta kaaralhitjika. <sup>4</sup> Altjirranha kangkama nurna ekura kaaralhamanga. Era turtantama nurnanha tnoatnoilama. <sup>5</sup> Nurna turtantama kaltja nama, nurna itja iltjalaiya erritjina Altjirranha pitjalpumanga. Iwunhang? Enka Alkngaltara erarrpa nurnanha kaltjinthakalanga Altjirranha nurnaka kngarra inthorra kangkamanga. Enka nhanha erinha kunha Altjirra erarrpa nurnakurna yairnakala.

<sup>6</sup> Arai, nurna thaltjantema namalanga, Kristanha relha kornarintja ntjarraka iluka. Era iluka antala Altjirrala arrkurlantema ingkairnakala inthorralla. <sup>7</sup> Relha kunha itja ngerra wulhama relha arratjaka paka ilutjika. Thunga relha arrpunha kala wulhamara relha kangkintjakartaka paka ilutjika. <sup>8</sup> Kristanha pula nurnaka iluka nurna kornarintjantema namalanga. Lakinha Altjirrala nurnanha ntelaka era nurnaka kngarra inthorra kangkamanga.

<sup>9</sup> Kristanha ilukalanga, Altjirrala nurnanha ilama nurna ekuranga urlarra arratja namanga. Lakinha Kristala nurnanha Altjirrakaa kngaranga tangkalhelaka. <sup>10</sup> Nurna nhanga Altjirrakaleltja naka. Altjirrala pula nurnanha tjini-laka, 'Lira ekuranha nurnakakwia ilumalanga. Lyarta nurna kala Altjirrakatjinantama nama.

Kristanha turta errilknga ntjarranga kamerakalanga, era nurnanha ngampakala tangkalhelitjina. <sup>11</sup> Nhanha turta. Ingkarta nurnakanha, Jesua Kristala, nurnanha Altjirralela tjinilakalanga, nurna kala lyarta arrkana nama.

*Adam Krista tharra*

<sup>12</sup> Arai, relha alha turta marrarrka naka. Relha arrkurlinya erantama korna ntelalhaka, iluka turta. Kurunga relha ingkarninya etna turta korna ntelalhamala, ingkarraka iluman-tema. <sup>13</sup> Nurna kaltja relha imankangatjina korna ntelalhakala, Altjirrala turnintja ekurannya itjantema Moses-anha ilakalanga. Altjirrala pula relha etnanha itja ilparnaka etna korna ntelalhamanga, era etnanha turnintja ekurannya itjantema ilakalanga warta. <sup>14</sup> Relha etna pula kalantemala iluka. Adam-angatjina, Moses-akurtitja, etna ingkarraka iluka. Etna kunha ingkarraka korna ntelalhaka, itja pula Adam ngerra.

Adam era kunha artwa arrpunha era ngerra naka, erala anma pitjitjinala. <sup>15</sup> Artwa eratharra pula tweta kuta nama. Adam-anha Altjirranga urlarra korna ntelalhaka. Altjirranha pula Kristarlarlanga relhaka ngwangala ntelalhaka. Artwa nyinta, Adam-anha, korna ntelalhamala, era relha ingkarrakanha urrurnaka. Altjirranha pula relha ingkarrakaka ngwangala ntelalhaka. Artwa nyintarlarlanga, Jesua Kristarlarlanga, era relha ingkarrakaka korna iwuka. <sup>16</sup> Altjirra-ke yearriperra, Adam-aka korna turta, nhanha tharra tweta nama. Adam-anha, nyintaranga Altjirranga urlarra korna ntelalhamala, era relha

ingkarrakanha imilaka. Altjirranha pula relha ingkarrakaka ngwangala ntelalhaka. Etna ntjarraranga korna ntelalhakalangatanya, era korna etnakanha kapanhanta iwuka. <sup>17</sup> Nthurrpa artwa nyinta korna ntelalhakalanga, relha ingkarraka kala ilwetnakantama. Arrpunha nhanha pula nthurrpantema nama. Artwa nyinta Jesua Kristanga arrkngala, Altjirrala relha nhanha etnanha ilama, “Rrangkarra nukanga urlarra arratja nama.” Relha nhanha etnantama ngampakala etatha nitjina.

<sup>18</sup> Arai, artwa nyinta korna ntelalhamala, era relha ingkarrakanha imilaka. Artwa nyinta arrpunha pula arratja ntelalhamala, era relha ingkarrakaka korna iwuka, etna etatha nitjinanga. <sup>19</sup> Artwa nyinta itja Altjirraka kangkwerraka. Ekuranga arrkngala relha ingkarraka Altjirringa urlarra relha kornarintja nama. Artwa nyinta arrpunha pula Altjirraka kangkwerraka. Ekuranga arrkngalantama relha ingkarraka Altjirringa urlarra arratja nama.

<sup>20</sup> Iwunhangantama Altjirrala relhanha turnintja ekuranha ilaka? Relha kngarralkura korna ntelalhitjinanga, arrkurlangatjina. Relha pula kornalkura ntelalhamanga, Altjirranha turta ngwangalkura ntelalhakantema. <sup>21</sup> Nhangarkurla relha etna iluka, etna korna ntelalhakalanga. Lyarta pula Altjirrala etnanha ilama, “Rrangkarra nukanga urlarra arratja nama,” Jesua Kristarlarlanga, Ingkarta nurnakarlarlanga. Ekurarlarlanga turta nurna ngampakala etatha nitjina.

## 6

*Nurnanha kaltjirrpulhelamalanga, nurna Kristalela iluka, kamerraka turta. Nurnantama Krista ngerra arratja ntelalhitjika*

<sup>1</sup> Nthakinhantama? Nurna kuta korna ntelal-hiai, Altjirranha nurnaka kngarralkura ngwanga ntelalhitjinanga? <sup>2</sup> Itja inthorra! Nurna kunha kala iluka. Nthakinhantama nurna lherrintja kornaka wotha kangkwerritjina? <sup>3</sup> Rrangkarra kala kaltja. Nurnanha kaltjirrpulhelamalanga, nurna Jesua Kristalela nyinterraka, ekuralela iluka turta. <sup>4</sup> Nurna turta Jesua Kristalela wolkgurna irrpuka. Arai, nurnataka ekuralela iluka, Kaarta ekarlta inthorralla nurnanha wotha etathilitjinanga, erala Kristanha wotha etathilakala ngerra. Nurnantama relha lyartinya ngerra ntelalhitjinanga.

<sup>5</sup> Arai, nurna Kristalela nyinterramala ilukalanga, Altjirrala turta nurnanha kamalhelitjina, erala Kristanha kamalhelakala ngerra. <sup>6</sup> Nurna kala kaltja, mpurrka korna nhanha ekurakartala nurna alknngerrakala, erinha kunha Altjirrala kala Kristalela ntolkaka kanthatukala. Lakinha Altjirrala mpurrka kornakarta nurnakanha yirralhelaka, nurnantama itja wotha lherrintja korna nurnakanhaka kangkwerritjinanga. <sup>7</sup> Etarlarai, relha erala errilnga intama, era itja wotha lherrintja kornaka kangkwerrama.

<sup>8</sup> Nurna paka Kristalela ilukalanga, nurna kaltja nurna ekuralela etatha nitjina. <sup>9</sup> Nurna

turta kaltja, Altjirrala Kristanha errilknga ntjar-ranga kamalhelakalanga, Kristanha itja wotha ilutjina. Relhalalka, errintjalalka erinha yarna wotha errilknga tuma. <sup>10</sup> Era nhanga ilumala, erataka kala nyintaranga kutanta iluka. Lher-rintja kornala erinha yarna wotha arrkarnama. Lyarta era kala Altjirrakakwianta etatha nama. <sup>11</sup> Lakinha rrangkarra turta. Relha arrpunhala rrangkarranha arrkarnamanga korna ntelalhitjika, rrangkarra kala relha errilknga ngerra nitjika. Rrangkarra pula Krista Jesualela nyinter-rakalanga, rrangkarra kala Altjirrakakwiantantama etatha nitjika.

<sup>12</sup> Lakinhangha rrangkarra itja lherrintja korna rrakangkarranha impurlarrarnitjika, rrakangkarra tjitjarterritjika. Rrangkarra itja lherrintja korna etnaka kangkwerritjika.

<sup>13</sup> Rrangkarra turta itja mpurrka rrakangkarranha errintjaka lanthitjika, korna ntelalhitjika. Rrangkarra pula rrakangkarrarrpa Altjirra lanthalhitjika. Era kunha rrangkarranha etathilaka, rrangkarra errilknga namalanga. Rrangkarra turta mpurrka rrakangkarranha Altjirra lanthitjika, arratja ntelalhitjika.

<sup>14</sup> Arai, lherrintja korna itja tjitjarta rrakangkarra nitjina, Altjirranha rrakangkarra ngwanga ntelalhamanga, Altjirra turnintjala turta rrangkarranha itja wotha ilparnamanga.

<sup>15</sup> Nthakinhantama? Altjirra turnintjala nurnanha itja wotha ilparnamanga, Altjirranha turta nurnaka ngwangantama ntelalhamanga, nurna kala korna kuta ntelalhai? Itja inthorra! <sup>16</sup> Rrangkarra itjala kaltja?

Ekurala rrankarra kangkwerrama, era kala tjitjarta rrankarra nama. Rrankarra paka lherrintja korna rrankarranhaka kangkwerramanga, kurunga lherrintja korna etna tjitjarta rrankarra nama. Rrankarra turta ilutjina. Rrankarra pula Altjirra kangkwerramanga, Altjirra rrankarranha ilitjina, “Rrankarra nukanga urlarra arratja nama.” <sup>17</sup> Atha Altjirra dangkilama. Imanka rrankarra lherrintja korna rrankarranhaka kangkwerritjata. Lyarta pula rrankarra angkatja nthurra ekurantama kangkwerrama, angkatja nthurra nhanga rrankarranhala kaltjinhakala. <sup>18</sup> Lakinhangha rrankarra itja wotha errintjaka urkapunhapunha nama, lherrintja korna rrankarranhaka kangkwerritjika. Rrankarra pula Altjirra urkapunhapunhatitja nama, arratja ntelalhitjika.

<sup>19</sup> Atha rrankarranha nhanha angkatja rukarala ilama, rrankarra angkatja nukanha yarna wukitja. Arai, imanka rrankarra mpurra rrankarranha errintjaka lanthitjata, korna inthorra turtantama ntelalhitjata. Lyarta pula rrankarra mpurra rrankarranha Altjirrakantama lanthitjika, arratjantama ntelalhitjika, rrankarra relha alknngaltarantama nitjinanga.

<sup>20</sup> Arai, lherrintja korna etna rrankarra tjitjarta namalanga, rrankarrathaka itja naka Altjirra kangkwerritjika. <sup>21</sup> Kwartiwuntja iwunhantama rrankarra inaka korna ntelalhamala? Ilutjikanta kunha. Nnanhiperra

rrangkarra lyarta porerramantama. <sup>22</sup> Arai, lyarta pula lherrintja korna etna itja wotha tjitjarta rrakangkarra nama. Altjirralla rrangkarraha etnakanga althakalthilaka. Altjirranhan-tama tjitjarta rrakangkarra nama, rrangkarra turta urrkapunhapunha ekuranha. Nthakinhan-tama Altjirralla rrangkarranha kwartiwutjina? Era rrangkarranha alknngaltarilitjina, ngampakala etatha tnyinitjina turta. <sup>23</sup> Arai, relha er-ala lherrintja korna ekuranhaka kangkwerrama, era kala ilutjina. Nhanha kwartiwuntja eku-ranha nama. Altjirraka yearriperra pula nama relha erinha ngampakala etatha tnyinitjika, er-ala Ingkarta nurnaka Jesua Kristalela nyinter-rakala namanga.

## 7

*Relha errilknga itja wotha turnintjakarta nama*

<sup>1</sup> Tjina ntjarrai, rrangkarra kala kaltja relha kunha turnintjakarta nama era ilutjinalpula. <sup>2</sup> Lakinhangra rrangkarra kala kaltja arrkutja paka noakarta namanga, ekurathaka nama artwa noa ekuranhalela kuterritjika, artwa era ilutjinalpula. Artwa noa ekura pula ilumanga, era kala noartaka turnintjanga althakalthantama nama. <sup>3</sup> Lakinhangra arrkutja paka artwa arrpunhalela nitjika lhamanga, artwa noa ekura etathantema namalanga, arrkutja era korna mpaarama. Artwa noa ekura pula ilukalanga, era kala althakalthantama nama. Erantama artwa arrpunhalela nitjika lhamanga, era itjala korna mpaarama.



<sup>4</sup> Tjina ntjarrai, lakinhanganga rrangkarra nhanganga Kristalela ilukalanga, rrangkarra Altjirraka turnintjanga urlarra kala errilknga nama. Nhanha lakinherraka rrangkarra arrpunhakantama nitjina, nhanhatitja Kristaka, erinhala Altjirralla errilknga ntjarranga kamalhelakala. Nurna turtantama Altjirranga urlarra arratja ntelalhitjina. <sup>5</sup> Arai, arrkurla nhanganga nurna itjan-tema Kristalela ilukalanga, Altjirraka turnintjala nurnanha pauwuka kngarralkura kornaka lherritjika. Altjirrallantama nurnanha imilaka. <sup>6</sup> Lyarta pula Altjirralla nurnanha itja wothe imilama. Iwunhanganga? Nurna nhanganga Kristalela ilukalanga, Altjirraka turnintjala turtantama nurnanha yarna wothe ilparnamanga. Lakinhanganga nurna lyarta Altjirraka kangkwerrama, Altjirraka Enkala nurnanha lyartinyilakalanga, itja imanka ngerra Altjirraka turnintjala nurnanha turnamalanga.

*Relha kristarinya turta korna ntelalhaman-tema*

<sup>7</sup> Nthakinhantama? Altjirraka turnintja etna kornama? Itja inthorra! Iwunhantama korna nama? Nhanhaka yinga kaltjerraka turnintja etnakanga. Turnintja arrpunhala paka yinganha itja parrakalanga, “Unta itja lherritjika,” yinga kotna kuta namara nhanha korna namanga lherritjika. <sup>8</sup> Yinga relha kornarintja nama. Lakinhanganga turnintja etna yinganha parramalanga, yinga kngarralkura lherraka. Turnintja etna paka itja nakalanga, yinga itja kornaka lherramara. <sup>9</sup> Arrkurla, turnintjaka kotna, yinga mar-

rarrka naka. Kurunga atha turnintja etnanha wumalanga, atha lhangkaraka yinga relha korna namanga. <sup>10</sup> Yinga turtantama iluka. Atha lhangkaraka turnintja nhanga Altjirralala relhanha ilakala, relhanha etathilitjika, etna inthor-rataka yinganha imilaka. <sup>11</sup> Yinga relha kornarintja namanga warta, yinga Altjirraka irrpalther-raka, atha turnintja ekuranha wumalanga. Erantama yinganha imilaka. <sup>12</sup> Turnintja etna pula alknfaltara kutala nama. Turnintja nyintaminyinta turta alknfaltara, arratja, marra nama.

<sup>13</sup> Nthakinbantama? Turnintja marralama yinganha imilaka? Itja inthorra! Turnintja etna wara kathilaka yinga relha kornarintja namanga. Turnintja etna turta ntelama yinga relha kornarintja kuta namanga.

<sup>14</sup> Nurna kaltja turnintja etna Altjirrakanha namanga, marra. Yinga pula relha kornarintjala. Lherrintja korna nukanha turta nuka tjitjarterrama. <sup>15</sup> Arai, yingataka yarna eterritjikerrama. Yinga arratja ntelalhitjika antja nama. Yinga pula itja arratja ntelalhama. Yinga itja antja nama korna ntelalhitjika. Yinga pula korna ntelalhamarrpala. <sup>16</sup> Arai, yinga pula korna ntelalhamanga, yinga itja korna ntelalhitjika antja namangatanya, kurunga atha turta lhangkarama turnintja etna marra namanga. <sup>17</sup> Lakinhangha, itja yinga inthorra korna ntelalhama. Lherrintja korna etnala nukanga kwanala nama, etnataka yinganha korna ntelalhitjika pauwuma. <sup>18</sup> Yinga kala nhandakanta kaltja. Mpurrka nukanha itja ekarlta nama marra ntelalhitjika. Yinga

kala marra ntelalhitjika antja nama. Yinga pula yarna marra ntelalhama. <sup>19</sup> Yinga itja antja nama lherrintja kornaka kangkwerritjika. Yinga antja nama marra ntelalhitjika. Yinga pula lherrintja korna etnakarrpantemala kangkwerralanama. <sup>20</sup> Arai, yinga paka kuta korna ntelalhamanga, yinga itja korna ntelalhitjika antja namangatanya, kurunga itja yinga inthorra korna ntelalhama. Lherrintja korna etnala nukanga kwanala nama, etna warataka yinganha pauwuma.

<sup>21</sup> Arai, yinga nthurpa marra ntelalhitjika antja nama. Lherrintja korna etna pula nuka kuta irrpaltherrama. <sup>22</sup> Yinga inthorra, nhanganga eterrintja nukanhala, Altjirraaka turnintjaka kangkama. <sup>23</sup> Mpurrka nukanhala pula lherrintja korna etna namarrpantemala. Etna nukalela turranga, nuka tjitjarterranga turta. <sup>24</sup> Yingantama nthakinheritjina? Altjirrala yinganha errilknga tutjina, yinga kornaka kuta lheramanga. Ngunhalantama yinganha mpurrka nhanhanga tangkalhelitjina? <sup>25</sup> Atha Altjirranha dangkilama, era yinganha kala tangkalhelakalanga, Ingkarta nurnaka Jesua Kristarlarlanga.

Arai, lakinbantama lyarta nukalela nama. Yinga, eterrintja nukanhalanta, Altjirraaka kangkwerrama. Mpurrka nukanhala pula, yinga lherrintja korna nukanhakala kuta kangkwerrama.

*Tnakanhakanha ntjarra Enkaka kangkwerramala etatha nama*

<sup>1</sup> Lakinhang, Altjirralla nurnanha itja wotha imilama, nurnala Krista Jesualela nyinterrakala namanga. <sup>2</sup> Iwunhang? Enka erala nurnanha etathilama Krista Jesuarlarlanga, era nurnanha tangkalhelakalanga Altjirraka turnintjala nurnanha ilparnamanga, nurnanha imilamanga turta. <sup>3</sup> Arai, Altjirraka turnintjala relha kornarintja nurnanha yarna tangkalhelaka, nurna Altjirraka yarna arratja kangkwerramanga. Altjirrallantama nurnanha tangkalhelaka, 'Lira eku ranha nurnakurna yairnamala. Era kala katjia intaka nurna ngerra. Era kala artwa kngarrantama namalanga, Altjirralla erinha rrarrathala tuka, relha arrpunha ntjarranha impurlarranamala erinha errilknga tutjika. Lakinha era relhaka kornakakwia iluka. Relhaka kornala turtantama relhanha yarna wotha imilama. <sup>4</sup> Kurunga relha nurnala Enka Alkngaltaraka kangkwerrama, itja lherrintja korna nurnakanhaka, nurnanha Altjirralla arama relha nhang turnintja ekuranhaka arratja inthorra kangkwerrakala ngerra.

<sup>5</sup> Arai, relha etnala lherrintja korna etnakanhakanta kangkwerrama, etna kala kornakanta thakerrama. Kanha relha etnala Enka Alkngaltaraka kangkwerrama, etna Enka Alkngaltarakala thakerrama. <sup>6</sup> Relha erala kornakanta thakerrama, era kala imilakala nama. Kanha relha erala Enka Alkngaltaraka thakerrama, era kala ngampakalala etatha nitjina. Era rilhera turta nitjina. <sup>7</sup> Arai, relha erala lherrintja korna

ekuranhakanta kangkwerrama, erataka Altjir-raka leltja nama. Era itja Altjirraaka turnintjaka kangkwerrama. Era turta yarna turnintja etnaka kangkwerrama. <sup>8</sup> Relha nhanha etna Altjirranha yarna inthorra tjinilama.

<sup>9</sup> Lherrintja korna rrakangkarranha pula it-jala tjitjarta rrakangkarranha nama. Enka Alkngaltara eratitja tjitjarta rrakangkarra nama, era warta rrakangkarranga kwanala namanga. Kanha relha erala Kristaka Enka itja eku-ranga kwanala tnyinama, era itja kuta Kris-takanha nama. <sup>10</sup> Kristanha pula rrakangkar-ranga kwanala namanga, Enka Alkngaltarala rrangkarra etatha kuta tnyinitjina, Altjir-rala ilakalanga, “Rrangkarra nukanga urlarra arratja nama.” Mpurrka rrakangkarranha pula ilutjinala, rrangkarra relha kornarintja namanga warta. <sup>11</sup> Rrangkarra kala kaltja Altjirrala Je-suanha errilnga ntjarranga kamalhelakala. Al-tjirraaka Enka, erala rrakangkarranga kwanala nama, era kala mpurrka arnarinya rrakangkar-ranha anma etathilitjina, Enka Alkngaltara eku-rarlarlanga, erala rrakangkarranga kwanala na-manga.

<sup>12</sup> Lakinhangka tjina ntjarrai, nurnakathaka itja nama mpurrka nurnakanhaka lherrintja kornaka kangkwerritjika. <sup>13</sup> Arai, rrangkarra paka lherrintja korna rrakangkarranhakanta kangkwerramanga, rrangkarra kala ngampakala ilutjina. Rrangkarra pula lherrintja korna rrakangkarranha pmakwinamanga, Enka Alkn-galtara era rrakangkarra tangitjala namanga, rrangkarra kala ngampakalala etatha nitjina.

14 Arai, relha etnanhala Altjirraka Enkala rretjingamanga, etna kunha Altjirraka 'lira nama. 15 Altjirralla kunha itja enka korna rrakangkarrurna yairnaka, rrangkarra tiraltha kuta nitjinanga. Era pula rrakangkarrurna enka marra yairnaka, Enka ekuranha inthorra, rrangkarra kaltja nitjinanga rrangkarra Altjirraka 'lira namanga, mangkalhelintja ekuranha. Lakinhanganga nurna Altjirranha kala “Abba,” nhanhatitja “Kaarta” anparnama. 16 Altjirraka Enka erarrpataka enka nurnakanha ilama nurna Altjirraka 'lira namanga. 17 Arai, nurna Altjirraka 'lirantama namanga, nurna kala 'lirala ngerra anma Altjirrakanha initjina, nhanga Kristalala kala Altjirrakanha inakala ngerra. Nurna kunha lyarta Kristanga arrkngala nyin-galauwuma. Anma pula nurna Kristalela nitjina pmara makalaria ekuranhala.

*Anma nurna turta makalaria inthorra nitjina*

18 Altjirra erarrpa antja nama nurna anma makalaria inthorra nitjika. Relha ingkarrakala turta nhanha katha aritjina. Lakinhanganga atha etarlarama nhanha palkala wara nama, nhanha nurnala lyarta nyin-galauwuma. 19 Arai, alha, irna, tnonthalka nhanga Altjirrallala arrpmar-nakala, etnataka ingkarraka thakerrama aritjika Altjirralla katha ntelamanga nurna nthurrrpa 'lira ekuranha namanga. 20 Arai, imanka Altjirralla alha nhanha kornilaka, relhaka kornanga ar-krngala. Era pula alha nhanha itja kutantaka kornilaka. 21 Alha erinha turta Altjirralla wotha marrilitjina, era anma katha ntelamanga nurna

nthurrrpa 'lira ekuranha namanga. Alha era turtantama makalaria nitjina, Altjirraka 'lira nurnala makalaria namanga ngerra.

<sup>22</sup> Nurna kala kaltja alha, irna, tnonthalka Altjirralala arrpmarnakala, etna ingkarraka lyartalpula mpangkama, arrkutjala ilkaartakarta mpangkamanga ngerra, katjia ekura intitjikerramanga. <sup>23</sup> Itja etnanta pula mpangkama. Nurna turta mpangkamantema, nurnala Altjirraka Enka kala tnyinama. Nurna mpangkama nurna kaaralhamalanga Altjirrala katha ntelitjika nurna nthurrrpa 'lira ekuranha namanga, nurnanha mpurrka alkirarinyantama nthamala. <sup>24</sup> Arai, Altjirrala nurnanha kala tangkalhelaka. Nurna pula kaaralhamantema era nhanha katha ntelitjika. Nhanha paka kala katha namanga, nurna itja wotha kaaralhamara. Nurna kunha itja lenhaka alkurnama, nurnala kala alknkala arama. <sup>25</sup> Nurna pula lenhaka alkurnamanga, nurnala itja alknkala arama, nurna kala kunpa tnoatnoala kaaralhama.

<sup>26</sup> Enka era nurnaka tangitjala nama, nurna thaltja namanga. Iwunhaka paka nurna Altjirrurna ingkitjika? Nhanhaka nurna itja kaltja. Enka era pula nurnakakwia Altjirrurna ingkama, kngarra mpangkamala, angkatja ekuranha inthorralla. Angkatja ekuranha relhala itja wuma. <sup>27</sup> Altjirra, erala relhaka eterrintja lhangkarama, era pula Enkaka mpangkintja wumala. Enka erataka relha alknkaltara ntjarrakakwia Altjirrurna ingkama, Altjirranhala antja namanga ngerra.

*Altjirranha nurnaka kangkamanga warta, arrpunhala nurnanha yarna Altjiranga ilkn-gakama*

<sup>28</sup> Nurna kala kaltja, relha etnala Altjirra kangkama, etnanha arrpunhala yarna kornilama. Ngunhantama relha etna, etnakala Altjirranha kangkama? Etna nama relha lenha ntjarra, etnanhala Altjirrala ntangkakala ekuriltja nitjika. Relha nhanha etna imampurlerramanga, arrpunhala paka etnanha tumanga, kornilamanga paka, Altjirrala etnanha kaltjinthama erinha kala ekarlalkura tnakitjikanta. <sup>29</sup> Arai, Altjirranha kunha arrkurlantema relha etnaka kaltja naka, etnala 'Lira ekuranha tnakitjinala. Erantama etnanha imankantema urraraka 'Lira ekura ngerrerritjika, 'lira ekura kalya kngarra etnaka nitjinanga. <sup>30</sup> Relha etnanhala Altjirrala arrkurlantema urrarakala ekuriltja nitjika, etnanha era ntangkaka turta ekururna pitjitjika. Relha etnanhala era ntangkakala, etnanha era ilaka, "Rrangkarra nukanga urlarra arratja nama." Relha etnanhala era ilakala, "Rrangkarra nukanga urlarra arratja nama," etnanha era alknaltarilaka turta.

<sup>31</sup> Altjirranha nurnaka lakinha ntelalhakalanga, iwunhantama atha rrangkarranha ilamara? Atha rrangkarranha nhanha ilama. Altjirra era tjina inthorra nurnaka namanga, relhala nurnanha yarna kornilama. <sup>32</sup> Altjirrala 'Lira ekuranha itja yinilaka. Era pula erinha relha ntjarraka lanthaka, etna erinha korna nurnakanhakakwia errilknga tutjika. Altjirra erala lakinha ntelalhakala, era kala nurnaka



kuta tangitjala nitjina turta. <sup>33</sup> Altjirra erarrpa nurnanha urarakalanga relha ekuriltja inthorra nitjika, relha arrpunhala nurnanha yarna wotha ilparnama. Altjirra erarrpa kunha ilama, “Rrangkarra nukanga urlarra arratja nama.” <sup>34</sup> Lakinhanganga relhala nurnanha yarna wotha imilama. Krista Jesua era kala korna nurnakanhakakwia iluka. Era errilknga naka, Altjirrara pula erinha wotha etathilaka. Era lyarta Altjirraka akwalantama nama, nurnakakwia turta Altjirrurna kutatha ingkama.

<sup>35</sup> Krista era nurnaka kangkamanga, relha arrpunhala nurnanha yarna ekuranga ilkn-gakama. Thunga etna nurnanha kornilama. Thunga etna nurnanha arrampowuma. Thunga etna nurnanha rrukunthakunthilama. Thunga etna marna nurnakanha rakama, yultha nurnakanha paka. Thunga etna nurnanha errilknga tuma. Etna pula nurnanha itja kuta Kristanga ilkn-gakitjina. <sup>36</sup> Lakinha Altjirraka Angkatja Imankinyala nurnanha ilama,

“Nurna Altjirraka tjina namanga, relha korna ntjarra kutatha antja nama nurnanha errilknga tutjika. Etna etarlarama nurna kula sheep ngerra namanga. Sheep nhanga relhalala karaka tuma.”

<sup>37</sup> Krista era pula nurnaka kangkamanga, arrpunhala nurnanha yarna pmakwinitjina. <sup>38</sup> Yinga nhanhaka kaltja inthorra nama. Nurna paka kuta etatha namanga, nurna

paka ilumanga turta, Altjirralla nurnanha tnyinama kuta. Thunga angel ntjarralla nurnanha Altjirranga ilknngakitjika antja nama. Thunga relha korna ntjarralla paka. Thunga errintja ntjarralla paka. Yinga kaltja etna nurnanha yarna kuta Altjirranga ilknngakitjina. <sup>39</sup> Thunga errintja arrpunha ntjarra kartninyala nama. Thunga errintja arrpunha ntjarra arna kwanala nama. Thunga errintja arrpunha ntjarra nurnaka lyarta irrpaltherrama. Thunga errintja arrpunha ntjarra nurnaka anma irrpaltherritjina. Yinga pula kaltja etna nurnanha yarna kuta Altjirranga ilknngakitjina. Krista Jesua Ingkarta nurnaka, nurnaka ilukalanga, Altjirranha nurnaka kangkintja kuta ntelalhitjina.

## 9

*Altjirra erarrpa nhanga Israel-arinya ntjar-ranha urarakala ekuriltja nitjika*

<sup>1</sup> Yinga nhanha Kristanga urlarra arratja inthorra angkama. Yinga itja orrtjerrama. Enka Alknngaltara era turta kaltja yinga arratja angkamanga. <sup>2</sup> Arai, yingataka kngarra inthorra ltarrperrama, kuta inthorra turta nthorrkngerrama. <sup>3</sup> Altjirralla yinganhanta kala imileikanha, Kristanga turta ilknngakeikanha, tjia nukanha ntjarrakakwia, Abraham-aka ramaramakakwia, <sup>4</sup> nhanga relha Israel-arinya ntjarrakakwia. Etnanharrka kunha Altjirralla urarakala 'lira eku-ranha nitjika. Etnanha era mangkalhelakala. Etnaka era ntelalhakala era makalaria inthorra

namanga. Era, etna turta, nhanga lheloalhelar-rakala. Etnanha era turnintja ekuranha ilakala. Etnanha era kaltjinthakala ekura arratja urrkur-  
rkintja nitjika. Etnanha era kngarra lhelakala.  
<sup>5</sup> Nhanha turta. Abraham, Isaac, Jacob ntjarralka  
kunha kaarta kngarra etnaka nakala. Etnakanga  
turtantama artwa Krista era ingkarna rratakala.  
Krista nhanha era relhalka ingkarrakaka Altjirra  
Kngarra nama. Erinha relhala ngampakala  
tnantjitjika. Amen.

<sup>6</sup> Arai, Altjirraka lhelintja itja ipmintjerraka.  
Relha ntjarra ilalhama etna kula relha Israel-  
arinya namanga. Etna pula itja ingkarraka  
relha Israel-arinya inthorra nama. <sup>7</sup> Arrpunha  
ntjarra ilalhama etna kula Abraham-aka katjia  
namanga. Etna pula itja ingkarraka Abraham-  
aka katjia inthorra nama. Altjirraka nhanga  
ilaka, “Isaac-anganta ramarama ungwanganha  
inthorra rratitjina.” <sup>8</sup> Nhanhatitja, itja katjia etna  
Altjirraka katjia inthorra nama, etnala alknge-  
rakala relha antja nakalanga. Katjia lenha  
ntjarranta pula, etnala alkngeerrakala Altjirraka  
kaarta mia etnakanha lhelakalanga. <sup>9</sup> Altjirraka  
nhanga Abraham-anha lhelaka, “Antala arratjala  
yinga pitjalputjina. Sarah-aka worra katjia kala  
intitjinantama.”

<sup>10</sup> Nhanha turta etarlarai. Rebekah-  
aka tjoanhanga kunha kaarta nyintakanha  
naka, aiwa nurnakanha Isaac-akanha.  
<sup>11-12</sup> Tjoanhanga eratharra pula itjantema  
alkngeerrakalanga, tjoanhanga eratharra  
turta itjantema korna ntelalhakalanga paka,  
Altjirraka Rebekah-anha ilaka, “Kalya kunha

tjia ekuranhaka kangkwerritjina.” Lakinha angkamala Altjirrala Rebekah-anha ntelaka era Jacob-anha urarakala, erarrpa Jacob-aka antja nakalanga. Jacob-anha itja kalya ekuranhanga marralkura naka, kalya ekuranha turta itja ekuranga kornalkura naka. <sup>13</sup> NhangA AltjirraKa Angkatja Imankinyala ilama, “Jacob-aka yinga kangkaka. Esau-aka pula yinga antjakunyala naka.”

<sup>14</sup> Nthakinhantama? Altjirranha itja arratja ntelalhama? Itja inthorra! <sup>15</sup> Era nhanga Moses-anha ilaka, “Yinga relha ekura montjamontja ntelalhitjina, ekurala yinga montjamontja ntelalhama. Yinga relha ekura konyerritjina, ekurala yinga konyerrama.” <sup>16</sup> LakinhangA, Altjirranha relhaka montjamontja ntelalhama, erarrpa antja namanga. Era itja montjamontja ntelalhama relha era antja namanga, relha era paka marra ntelalhamanga. Kala erarrpa antja namanga wara. <sup>17</sup> AltjirraKa Angkatja Imankinyala nur-nanha ilama, Altjirrala Pharaoh-anha ilakala, “Nhanhakakwia atha nganha ingkairnaka king nitjika, atha relha ingkarrakanha ntelitjinanga yinga ekarlta inthorra namanga, nganha tumala. Kurunga pmararrpaninhala relha ingkarraka rretnya nukanhaka kaltja nitjina.” <sup>18</sup> LakinhangA, Altjirranha relha ekura montjamontja ntelalhama, ekurala era montjamontja ntelalhitjika antja nama. Kanha relha erinhala era arrthatilitjika antja nama, erinha era kala arrthatilama.

<sup>19</sup> LakinhangA thunga arrpunhala yinganha pmarritjina, “Iwunhangantama Altjirrala rel-

hanha ilparnama? Relha kunha yarna Altjir-ranga ekarlterrana.” <sup>20</sup> Relhai, unkwangath-akalka itjama nama Altjirranha angkatja nthit-jalputjika. Arai, thunga relhala irna arna urrkng-ganga mpaarama. Irna era yarna relha erinha ilama, “Iwunhangala unta yinganha lakinha mpaaraka?” <sup>21</sup> Relha erala urrkngala mpaarama, ekurathaka kunha kala nama arna urrknga nyintanga irna intorta paka mpaaritjika, irna alkumpa turta.

<sup>22</sup> Lakinha ngerra Altjirranha turta. Era relha arrpunha ntjarranha mpaaraka, etnaka aalerritjika, etnanha yirralhelitjika turta. Era pula etnanha kuta inthorra makaraka. Iwun-hanga? Era antja nakalanga relha arrpunha ntjarranha ntelitjika era aa kngarra namanga, ekarlta inthorra turta. <sup>23</sup> Era turta antja nakalanga montjamontja inthorra ntelalhitjika. Ngunhaka? Relha etnaka, etnanhala era ar-rkurlantema mpaarakala, etnaka montjamontja ntelalhitjika. <sup>24</sup> Nurna turta relha worla nhan-hala namantema. Nurnakanga arrpunha ntjarra relha Jew nama, arrpunha ntjarra Relha Lorinya.

<sup>25</sup> Lakinha inthorra kunha Altjirranha angkama, Hosea-aka Pepala,

“Relha etna, etnala itja relha nukanha nakala, etnantama relha nukanha nitjina.  
Relha etna, etnakala yinga itja kangkakala, etnakantama yinga kangkitjina.

<sup>26</sup> Pmara ekura inthorralla atha etnanha ilakala, rrangkarra itja wothe relha nukanha nama, pmara ekura inthorralantema

atha etnanha ilitjina, rrangkarra kunha  
Altjirra etatha ekura 'lira nama.”

<sup>27</sup> Kanha Isaiiah-anha relha Israel-arinya ntjar-  
riperra lakinhala angkama,

“Israel-aka ramarama arna urlpaiya ngerra  
ntjarra kngarra nama. Atha pula etnakanga  
urrputja wara tangkalhelitjina. <sup>28</sup> Atha  
Ingkartala warta relha ingkarrakanha  
inguntha wara kala tjperrawutjina.”

<sup>29</sup> Nhangha Isaiiah-anha arrkurlantema angkaka,  
“Ingkarta Ekarlta Inthorralla paka itja  
relha urrputja nurnakanha tutjala  
impukalanga, nurna kala pmara Sodom,  
Gomorrh tharra ngerra namara.”

*Relha Israel-arinya ntjarrala Altjirranha itja  
tnakaka*

<sup>30</sup> Lakinhatoka atha rrangkarranha ilama.  
Relha Lorinya arrpunha ntjarra itja arrkarnal-  
haka Altjiranga urlarra arratja nitjika, nhangha  
Altjirra turnintjaka kangkwerramala. Altjir-  
rala pula etnanha ilaka, “Rrangkarra nukanga  
urlarra arratja nama, rrangkarra yinganha  
tnakakalanga.” <sup>31</sup> Kanha relha Israel-arinya  
ntjarra arrkarnalhakala Altjiranga urlarra ar-  
ratja nitjika, Altjirra turnintjaka kangkwerra-  
mala. Etnanha Altjirrala ilaka, “Rrangkarra itja  
nukanga urlarra arratja nama.” <sup>32</sup> Iwunhangha?  
Etna Altjirranha itja tnakakalanga. Etnataka  
antja naka Altjiranga urlarra arratja nitjika,

Altjirraka turnintjaka kangkwerramala kula. Et-nantama relha panga ngerra parta nhanganga tnyinhaka. <sup>33</sup> Altjirralla Angkatja Imankinya ekuranhala ilama,

“Arai, atha pmara Zion-ala parta arrarnama. Parta nhanha ekuranga relha tnyinhitjina, ntjilpartilalhitjina turta. Kanha relha era, erala erinha tnakama, era itja kuta nakapakarlerritjina.”

## 10

<sup>1</sup> Tjina ntjarrai, yingataka antja inthorra nama Altjirralla relha Israel-arinya ntjarranha tangkalhelitjika. Nhaakakwia yinga etnakakwia ilporatha inthorra Altjirrurna ingkama. <sup>2</sup> Yinga kaltja etna kngarra inthorra Altjirraka thakerramanga. Etna pula marntilparla wararrpala thakerramanga. <sup>3</sup> Etna kngwerraka Altjirralanta relhanha irrpalthala ilama, “Unta nukanga urlarra arratja nama.” Etna pula turnintjaka kula kangkwerramala angkama, “Yinga Altjirranga urlarra arratja nama.” Lakinha etna Altjirranha parrama. Erantama etnanha yarna ilama, “Unta nukanga urlarra arratja nama.” <sup>4</sup> Arai, Kristanha Altjirraka turnintjaka arratja inthorra kangkwerraka. Lakinhangha relhala Jesuanha tnakamanga Altjirralla relha erinha irrpalthala ilama, “Unta nukanga urlarra arratja nama.”

<sup>5</sup> Arai, Moses-ala nhang a intalhelaka, relha erala turnintjaka arratja kangkwerrama, era kuta etatha nitjina. <sup>6</sup> Kanha era lakinhala intalhelaka relha ekuriperra, erala Altjirranga

urlarra arratja namanga, era Kristanha tnakamanga. “Unta itja pmarralhitjika, ‘Ngunhama alkirurna ntjimara?’” (nhanhatitja Kristanha alhurna tnanpulhelitjika). <sup>7</sup> “Unta turta itja pmarralhitjika, ‘Ngunhama alha kwanurna irrpumara?’” (nhanhatitja Kristanha relha errilknga ntjarranga kngitjalputjika). <sup>8</sup> Era pula lakinhatitja intalhelaka, “Altjirraka Angkatja unkwanganga etinya nama, nhanhatitja rrakarta unkwanganhala, eterrintja unkwanganhala turta.” Altjirraka Angkatja nhanha era nama, angkatja nurnala rrangkarranha kaltjinthama, angkatja nurnala tnakama turta. <sup>9</sup> Arai, unta paka alkngatharra angkamanga, “Jesuanha Ingkarta nama,” unta turta tnakamanga Altjirralla erinha errilknga ntjarranga kamalhelakala, Altjirralla nganha kala tangkalhelitjina. <sup>10</sup> Arai, Altjirralla kunha nganha ilama, “Unta nukanga urlarra arratja nama,” unta erinha tnakamanga. Era turta nganha tangkalhelama unta alkngatharra angkamanga era Ingkarta namanga. <sup>11</sup> Altjirraka Angkatja Imankinyala nurnanha ilama, “Relha erala Altjirranha tnakama, era itja nakapakarleritjina.” <sup>12</sup> Angkatja nhanha kala relha ingkarrakaka nama, relha Jew ntjarraka, Relha Lorinya ntjarraka turta, loala kuta, Altjirranha relha ingkarrakaka Ingkarta namanga warta. Era turta kangkintja ntelalhama relha ingkarrakaka, etnala ekururna ingkamanga. <sup>13</sup> Altjirraka Angkatja arrpunhala turta nurnanha ilama, “Relha erala Ingkarturna ingkamanga, erinha Ingkartala kala



tangkalhelitjina.”

<sup>14</sup> Relha etna pula yarna Ingkarturna ingkama, etna erinha itja arrkurla tnakakalanga. Etna turta Ingkartanha yarna tnakama, arpunhala etnanha itja arrkurla Ingkartiperra kaltjinthakalanga. Etna turta yarna Ingkartiperra yia wuma, arpunhala etnanha itja kaltjinthamanga. <sup>15</sup> Arrpunhala turta etnanha yarna kaltjinhama, Ingkartala paka urrpia itja etnakurna yairnakalanga. Lakinhanganga Altjir-raka Angkatja Imankinyala nurnanha ilama, “Urrpia etna kunha tjiparra inthorra nama, etnala yia marrakarta pitjimanga.”

<sup>16</sup> Relha Israel-arinya ntjarra, etna pula itja ingkarraka Yia Marra ekura kangkwerraka. Isaiiah erarrpa nhanga ilama, “Ingkartai, ngunhalama angkatja nurnakanha tnakaka?” <sup>17</sup> Lakinhanganga nurna kaltja, relhala kunha Altjirranha tnakama Yia Marra erinha wumala. Yia Marra era pula nama yia Kristiperra.

<sup>18</sup> Nthakinhantama? Relha Israel-arinya ntjar-rala Yia Marra erinha itjama wuka? Itja inthorra, etna kala wukanta kuta. Altjirraka Angkatja Imankinyala nurnanha ilama,

“Urrpia etnaka angkatja pmara ingkarrakurna anparerranhaka. Relha ingkarrakala turta angkatja erinha wuka.”

<sup>19</sup> Nthakinhantama? Relha Israel-arinya etna Yia Marra erinha itjama lhangkaraka? Itja inthorra. Moses-ala nhanga intalhelaka,

“Inkartanha angkama, ‘Yinga Relha Lorinya ntjarraka kangkintja ntelalhamalanga, rrangkarra etnaka antjakunyerritjina. Yinga relha kornakorna ntjarraka montjamontja ntelalhamanga, rrangkarra etnaka yirrkngerritjina.’ ”

<sup>20</sup> Kurunga Isaiah-ala turta intalhelaka, “Inkartanha angkama, ‘Relha Lorinya ntjarra, etnala nuka itja yonthakala, etna yinganha arltaraka. Relha Lorinya ntjarra, etnala nuka itja pmarralapukala, etnaka yinga ntelalhaka.’ ”

<sup>21</sup> Kanha relha Israel-arinya ntjarriperra Isaiah-ala lakinhala intalhelaka,

“Inkartanha angkama, ‘Yinga kuta inthorra arrkarnalhaka relha arrthata, marntilparla nhanha ntjarralela rilhererritjika.”

## 11

*Altjirrala Relha Israel-arinya urrputja ar-rpunha kuta tnyinamantema*

<sup>1</sup> Atha wotha pmarrama, Altjirrala relha eku-ranha ntjarranha ipmintjama impuka? Itja inthorra! Arai, yinga turta relha Israel-arinya namantema. Yinga Abraham-aka annga nama, Benjamin-aka ramarama turta. <sup>2</sup> Arai, Altjirrala itja relha ekuranha ntjarranha ipmintja impuka, relha nhanga etnakala era arrkurlantema kaltja nakala. Rrangkarra Altjirrala Angkatja Imankinyaka kngwerrakama, angkatja nhanga

Elijah-iperraka? Elijah-ala kunha relha Israel-arinya ntjarranha Altjirringa urlarra ilparnaka. <sup>3</sup> “Inkartai, etna kunha urrpia unkwanganha ingkarraka errilknga tuka. Etna turta altar unkwanganha ingkarraka urltakaka. Kala yinga nyintantantama unkwanga kangkwerramala nama. Lyarta etna yinganha turtantama errilknga tutjika yonthama.” <sup>4</sup> Kanha Altjirralla erinha nthakinhalala ilaka? “Atha kunha artwa 7,000 nuka tnyinamantema. Etna itja Baal-aka urrkurrkintja naka.” <sup>5</sup> Lakinha ngerra lyarta namantema. Relha Israel-arinya urrputja arpunha Altjirraka kuta namantema, Altjirra erarra etnanha urrarakalanga, etnaka ngwanga ntelalhamala. <sup>6</sup> Arai, Altjirralla paka Israel-arinya nhanha etnanha urrarakalanga erarra ngwanga namanga, kurunga era etnanha itja urraraka etna ekura arratja kangkwerrakalanga. Kala erarra ngwanga namanganta wara pula.

<sup>7</sup> Nthakinhantama? Relha Israel-arinya etna kunha antja inthorra naka Altjirringa urlarra arratja nitjika. Nhanha pula itja lakinherraka. Urrputja wara Altjirringa urlarra arratja naka, urrputja nhangha Altjirralla urrarakala etnantakwia. Arrpunha ntjarranha pula Altjirralla arthatilakala. <sup>8</sup> Altjirraka Angkatja Imankinyala nurnanha ilama,

“Altjirralla etarlingetarla etnakanha parrpartilaka. Era alknga etnakanha kornilaka, etna yarna arratja aritjinanga. Era ilpa etnakanha kornilaka, etna yarna arratja wutjinanga. Nhanha lyartalpula

lakinha nama.”

<sup>9</sup> David-ala turta nurnanha ilaka,

“Altjirrai, etna tjinkarra kunpala  
ilkumanga, etnanha nakapakarlilai, etnanha  
twai turta.

<sup>10</sup> Altjirrai, alknga etnakanha pangilai,  
etnanha rrukunthakunthilai turta.”

*Anma Altjirrala relha Israel-arinya ntjarranha  
wotha inetnitjina*

<sup>11</sup> Atha wotha pmarrama, Relha Israel-arinya  
ntjarra Altjirranga mpakalhakalanga, Altjirrala  
etnanha kala kutantakama imilaka? Itja  
inthorra! Etna mpakalhakalanga, Altjirrala  
Relha Lorinya ntjarranharrkantama tangkalhe-  
laka. Era etnanharrka tangkalhelaka relha  
Israel-arinya ntjarra turtantama Yia Marra ekura  
lherritjinanga. <sup>12</sup> Altjirrala Relha Lorinya ntjar-  
ranha tangkalhelaka, etnanha marrilaka turta,  
Israel-arinya ntjarrala Yia Marra erinha ipmintja  
impukalanga. Relha Israel-arinya ntjarrala tur-  
tantama Yia Marra erinha tnakamanga, relha  
ingkarrakantama arrkana inthorra nitjina.

<sup>13</sup> Yinga pula nhanha Relha Lorinya  
rrakangkarrurnantama angkama. Altjirrala  
kunha yinganha rrakangkarrurna yairnaka.  
Athantama rrangkarranha ilporatha inthorra  
kaltjinthama. Iwunhanga? <sup>14</sup> Relha  
nukanha ntjarra turtantama Yia Marra  
ekura lherritjinanga. Kurunga Altjirrala  
etnakanga urrputja turta tangkalhelitjina.  
<sup>15</sup> Arai, relha Israel-arinya ntjarranha

ipmintja impumala, Altjirranha Relha Lorinya ntjarralela rilhererraka. Nthakinhantama nitjina Altjirrala relha Israel-arinya ntjarranha wotha inetnamanga? Nhanha kala nitjina relha errilknganga kamerrakala ngerra. <sup>16</sup> Etarlarai, unta paka marna urltakamala karta arrpunha Altjirranha tjauwerrilya nthamanga, kurunga karta arrpunha era turta alknfaltara namantema. Nhanha turta. Takarra paka marra namanga, kala irna ntjapara marra nama.

<sup>17</sup> Relha Israel-arinya etna, Altjirraka irna ntjarra ngerra naka. Irna arrpunha ntjarra ntjirrkerrakalanga, Altjirrala etnanha urlpuntjimala iwuka. Erantama irna arrpunha ntjarra katha etnakanhaka ingkairnaka. Irna arrpunha nhanha etna rrangkarra nama. <sup>18</sup> Rrangkarrantama itja tjurnalhitjika. Rrangkarra pula tjurnalhitjika eterramanga, rrangkarra ilpangkitjika Altjirrala rrangkarranha, etnanha turta kwatja nthama. Kwatja nhanhalanta kunha rrangkarranha etatha tnyinama. <sup>19</sup> Thunga rrangkarra lakinha angkitjina. “Altjirrala kunha irna ntjirrkarranha urlpuntjimala iwuka, era nurnanhantama katha etnakanhaka ingkairnitjinala.” <sup>20</sup> Rrangkarra kala arratja angkama. Altjirrala pula etnanha urlpuntjimala iwuka, etna erinha itja tnakakalanga. Rrangkarranhantama era ingkairnaka, rrangkarra erinha tnakakalanga. Rrangkarra pula itja tjurnalhitjika. Rrangkarra treritjikatitja. <sup>21</sup> Altjirrala paka irna arrkurlinya nhangha ntjarranha itja makarakalanga, era rrangkarranha turta itja makaritjina.

<sup>22</sup> Etarlarai! Altjirranha kunha relhaka kangk-

intja ntelalhama. Era turta relhanha itja makarama. Tharra kuta. Relha Israel-arinya etnala ekuranga mpakalhakala, etnanha era itja makaraka. Kanha rrakangkarra era kangkintjala ntelalhaka. Era turta rrakangkarra kuta kangkintja ntelalhitjina, rrangkarra ekuranga itja unpulhamanga. Rrangkarra paka ekuranga unpulhamanga, era rrangkarranha turta irna ntjirrka nhangha ntjarranha ngerra urlpuntjimala iwutjina. <sup>23</sup> Relha Israel-arinya ntjarrala paka Yia Marra erinha tnakamangantama, Altjirralla etnanha wotha irrpalthala ingkairnama, etathilama turta. <sup>24</sup> Etarlarai! Altjirralla rrangkarra katha kornanga inamala irna marra eku-ranhanha ntjarranga mpopaka ingkairnaka, kwatja nthamala etathilaka turta. Relha Israel-arinya ntjarra, etna kunha irna ntjirrka ntjarra ngerra naka Altjirrallala urlpuntjimala iwukala. Etna paka Altjirrannya tnakamangantama, Altjirralla etnanha kala wotha ingkairnitjina irna eku-ranhanha arrpunha ntjarranga mpopaka, etnanha etathilitjina turta.

<sup>25</sup> Tjina ntjarrai, atha rrangkarrannya angkatja Altjirralla lauwukalarrkantama ilama, rrangkarra inangkarlakathana etarlaralhakitja. Arai, relha Israel-arinya ntjarranga, Altjirralla ntjarra arrpunhanta arrthatilaka, Relha Lorinya etnarrka Altjirraka worlurna irrputjinanga. <sup>26</sup> Kurunga Altjirralla relha Israel-arinya ingkarrakanhantama tangkalhelitjina. Nhangha Altjirraka Angkatja Imankinyala nurnannya ilama,

“Pmara Zion-anga tangkahlhelanha era pitjitjina. Era Israel-aka ramarama wotha marrilitjina. <sup>27</sup> Atha, Altjirrala, korna etnakanha iwutjina. Nhanha atha etnanha lhelama.”

<sup>28</sup> Relha Israel-arinya etna Yia Marra erinha ipmintja impukalanga, etna Altjirraka leltjerraka. Nhanha rrakangkarra marraka nama. Altjirranha pula etnaka tjina kuta nama, era kaarta etnakanha imanka urarakalanga warta. <sup>29</sup> Era nhanga kaarta etnakanha lhelaka, era kaarta etnakanha pmaralka nthaka. Lhelintja nhanha turta itja ipmintjerraka.

<sup>30</sup> Relha Lorinya ntjarrai, imanka rrangkarra Altjirraka itja kangkwerritjata. Lyarta pula Altjirranha rrakangkarra montjamontjantama ntelalhaka, relha Israel-arinya ntjarra ekura itja kangkwerrakalanga. <sup>31</sup> Lyarta Israel-arinya ntjarrantama Altjirraka itja kangkwerrama. Altjirranha pula etnaka anma montjamontja ntelalhitjina, erala rrakangkarra montjamontja ntelalhakala ngerra. <sup>32</sup> Arai, Altjirrala relha ingkarrakanha ilama etna ekuranga urlarra kangkwerrintja marnta nama. Iwunhanga? Era relha ingkarrakaka montjamontja ntelalhitjinanga.

*Paul-ala Altjirranha tnantjama*

<sup>33</sup> Yakai, Altjirranha kunha inangkarlalkura, kaltjalkura turta nama relha ingkarrakangatjina, alkirarinya ingkarrakangatjina turta. Era relhaka montjamontja inthorra, kangkintja inthorra turta ntelalhama. <sup>34</sup> Relha itja Altjirraka

eterrintjaka kaltja. Relhala itja Altjirranha kaltjinhaka. <sup>35</sup> Relhala turta Altjirranha itja yultha paka nthaka, Altjirrala erinha kapanha nthitjinanga. <sup>36</sup> Eratitja alhalka ingkarraka arrpmarnaka. Eratitja alhalka ingkarraka lyarta errkuma. Era turta alhalka, ingkarraka anma lyartinyilitjina. Era makalaria nama. Relhala erinha ngampakala tnantjitjika. Amen.

## 12

### *Altjirraka urrkurrkintja arratja era*

<sup>1</sup> Tjina ntjarrai, Altjirranha kunha rrankangarra montjamontja inthorra ntelalhaka. Lakinhanganga atha rrankarranha angkatja ekarlatala ilama. Mpurrka rrankangarranha Altjirranha tjauwerrilya ngerra ntharrirrai. Nhanhatitja kala ekurantantama etarlaramala narrirrai. Nhanha rrankangarrathaka nama. Nhanhaka Altjirranha kangkama. Lakinha turta rrankarra Altjirraka arratja urrkurrkintja nama. <sup>2</sup> Rrankarra turta itja wotha relha korna ntjarraanha impurlarrarnitjika eterrintja rrankangarranha kornilitjika. Rrankarra pula Altjirranhatitja impurlarrarnitjika eterrintja rrankangarranha marrilitjika. Kurunga rrankarra irrpalthala lhangkaritjina Altjirranhala antja namalaka. Iwunhathoa Altjirraannga urlarra marra nama, arratja turta? Iwunhakathoa Altjirranha kangkama? Nhanha ingkarraka rrankarra kala irrpalthala lhangkaritjinantama.

*Itja tnakalhitjika, arratjanta etarlalhitjika*



<sup>3</sup> Altjirranha nuka ngwanga ntelalhakalanga, atha rrankarranha nyintaminyintanha lakinha ilama. Tnakanhakanha arrpunha itja tnakalhitjika, era tjina tnakanhakanhanga marralkura namanga. Altjirranha kunha rrakangkarra ingkarrakaka loala ngwanga ntelalhaka. <sup>4</sup> Rrangkarra kala kaltja, mpurrka nurnakanha iltjakarta, ingkakarta, alknagakartalkala namanga. Itja nurnakanha urrkaputjikalka nama, ingka nurnakanha nthulaputjika nama, alknaga nurnakanha aritjika nama. <sup>5</sup> Nurna nhandhaka turta kaltja. Nurna ingkarraka, ntjarra era purrama, mpurrka nyinta nama, Altjirralla nurnanha Kristalela nyintalhelakalanga. Tnakanhakanha arrpunhantama mpurrka nhandha ekura iltja ngerra nama. Tnakanhakanha arrpunha mpurrka nhandha ekura ingka ngerra nama. Tnakanhakanha arrpunha mpurrka nhandha ekura alknaga ngerra nama. <sup>6</sup> Altjirralataka nurnanha nyintaminyintanha pelaka, era antja namanga ngerra. Lakinhangha unta paka inangkarla namanga Altjirraka Angkatja kaltjinhitjika, kala relha ntjarranha arratja kuta kaltjinhai. <sup>7</sup> Unta paka arrpunha ntjarraka irrpalthala tangitjala namanga, kala etnaka tangitjala nai. Unta paka kaltja namanga Altjirraka Angkatja nentilitjika, kala relha ntjarraka angkatja erinha arratja nentilai. <sup>8</sup> Unta paka arrpunha ntjarranha irrpalthala tjipatjipilamanga, kala etnanha tjipatjipilai. Ungkwanga paka yultha kngarra intamanga, kala relha ilknngaranha kangkintjala nthai. Unta

paka arrpunha ntjarraka tjitjarta namanga, kala etnaka arratja tjitjarterrai. Unta paka arrpunha ntjarraka irrpalthala konyerramanga, kala etnaka parrpa konyerrai.

*Tjia tnakanhakanhaka kangkintja ntelalhai*

<sup>9</sup> Rrakangkarranga nyintaminyinta pmathakunya kangkintja ntelalhitjika. Iwunha pakama korna nama? Nhanhanga tjanalhai. Iwunha pakama marra nama? Nhanhaka thakerai. <sup>10</sup> Rrangkarra kanhanganhanga kangkintja ngerra urlarrakurlarra kangkintja ntelalhitjika. Rrangkarra itja tjia rrakangkarranha lolowutjika. <sup>11</sup> Rrangkarra Ingkartanha kuta etarlaritjika. Rrangkarra turta Ingkartaka tji-patjipa kuta urrkurrkintja nitjika. <sup>12</sup> Rrangkarra Ingkartaka kaaralhamanga warta, rrangkarra arrkana kuta nitjika. Rrangkarra imampurleramanga, itja thakerritjika. Rrangkarra kutatha Altjirrurna ingkitjika. <sup>13</sup> Tjina tnakanhakanha unkwanganha paka rapa namanga, erinha kala nthai. Relha epinya ntjarraka turta kangkintja ntelalhai.

*Leltjaka turta kangkintja ntelalhai*

<sup>14</sup> Relha arrpunhala nganha tutjika lurnamanga, ekurakwia Altjirrurna ingkai, Altjirruala erinha lyekarrilitjika. Unta itja Altjirrurna ingkitjika erinha kornilitjika. <sup>15</sup> Relha arrpunha arrkana namanga, ekuralela arrkanerrai. Relha arrpunha paka ltarrpa namanga, ekuralela ltarrpa nai. <sup>16</sup> Relha nyintaminyintaka rilhera ntelalhai. Itja tjurnalhitjika. Relha kornakorna

ntjarraka turta tjina ntelalhai. Itja tnakalhitjika untanta kula inangkarla namanga.

<sup>17</sup> Relha arrpunhala nganha kornilamanga paka, unta erinha itja kapanha kornilitjika. Relha ingkarrakanga urlarra arratjanta ntelalhai. <sup>18</sup> Arrkarnalhai relha ingkarrakalela rilhera nitjika. <sup>19</sup> Tjina ntjarrai, itja relha arrpunhanha kapanha tutjika. Relha arrpunhala paka nganha tukalanga, erinha kala impai, Altjirrala tutjika. Altjirraka Angkatja Imankinyala nhanga ilama,

“Nukathaka kunha nama kapanha tutjika. Atha turta kala kapanha tutjina,”  
Inkartanha angkama.

<sup>20</sup> Unta lakinhatitja ntelalhai. Nhanga Altjirraka Angkatja Imankinya arrpunhala ilama,

“Leltja unkwanga ngaiyala namanga, erinha ilkutjika nthai. Era angkathala namanga, erinha ntjutjika nthai. Unta lakinha ntelalhamalanga, era poreritjina.”

<sup>21</sup> Relha arrpunha unkwanga yirrngerramanga, nganha iltamanga, nganha tumanga paka, ekura kangkintja kuta ntelalhai. Lakinha unta errintja erinha, relha korna erinha turta parritjina.

## 13

### *Tjitjartaka kangkwerrai*

<sup>1</sup> Relha ingkarraka tjitjarta etnakanhaka kangkwerritjika, Altjirrala warta tjitjarta

etnanha ingkairnakalanga. Altjirrala etnanha arrarnaka relha etnakanhaka tjitjarterritjika. <sup>2</sup> Lakinhangha relha erala tjitjarta ekuranhaka irrpaltherrama, erataka kala Altjirrakanta kuta irrpaltherrama. Era turta Altjirranga urlarra ilkarrtjerrama. <sup>3</sup> Arai, Altjirrala itja tjitjarta etnanha ingkairnaka relha marra ntjarranha tirala nthitjika. Kala relha korna ntjarranhanta. Unta paka tnoatnoa nitjika antja namanga, kala arratjanta ntelalhai, kurunga tjitjarta era nganha kunpala aritjina. <sup>4</sup> Tjitjarta era kunha Altjirraka urrpia nama, nganha marra ntarntaritjika. Unta pula korna ntelalhamanga, unta kala ekuranga trerritjikala. Era itja errauwia ekurannya palkala wara tnyinama. Era Altjirraka urrkapunhapunha nama, relha korna ntelalhamala ntjarranha rrarrathala tutjika. <sup>5</sup> Lakinhangha unta tjitjarta unkwanganhaka kangkwerritjika, itja era nganha rrarrathala tukitjanganta, untarra turta pula arrkana wulhitjinanga.

<sup>6</sup> Nhanhakakwia turta rrangkarra tax money rrakangkarranha tjitjarta etnanha nthama. Etna Altjirraka urrkapunhapunha nama. Etna rrakangkarra tjitjarerrama. <sup>7</sup> Kalantama, tjitjartala rrangkarranha turnamalanga etnanha tax money nthitjika, rrangkarra etnanha tax money erinha arratja kuta ntjitjika. Rrangkarra etnaka kangkitjika, etnakanga urlarra porapora turta ntelalhitjika.

*Relha arrpunhaka kangkamala, nurna kala  
Altjirraka turnintjaka arratja kangkwerrama*

<sup>8</sup> Unta relha arrpunhanha money paka, yultha paka lhelamanga, erinha nhanha kala nthitjalpai. Ungkwangathaka nhanhanta nama, relha arrpunhaka kangkintja ntelalhitjika. Relha erala relha arrpunhaka kangkintja ntelalhama, era kala Altjirraaka turnintja ingkarrakaka kangkwerrama. <sup>9</sup> “Unta itja relha arrpunhaka noalela intitjika.” “Unta itja errilknga tutjika.” “Unta itja relha arrpunhaka yultha nyilkngala initjika.” “Unta itja lherritjika.” Relha erala relha arrpunhaka kangkama, erala ekuriltja kangkamanga ngerra, era kala turnintja nhanha ntjarraka kangkwerrama, turnintja arrpunhaka turta. <sup>10</sup> Relha erala relha arrpunhaka kangkama, era itja relha arrpunhanha kornilama. Lakinhang, relha erala relha arrpunhaka kangkama, era kala Altjirraaka turnintja ingkarrakaka kangkwerrama.

*Nurna Altjirranha kuta etarlaramala nitjika, arlta nhanga ekuralala Altjirrala nurnanha tangkalhelitjinala, era kala etinyangantama*

<sup>11</sup> Nhanha turta. Arlta ekuralala Altjirrala nurnanha tangkalhelitjinala, era kala etinyalkurantama nama, arlta ekurangatjina, nurnala Altjirranha tnakakala. Arlta nhanha erinha etarlaramala, rrangkarra kala ankwanga kaarerritjika. <sup>12</sup> Ingwa era kunha kala yirritjikerama. Kala arlterritjikerrama turta. Lakinhang nurna itja wotha lherrintja korna nurnakanhaka kangkwerritjika. Nurna pula thakerritjika marra nitjika. <sup>13</sup> Kala arltanga warta, nurna arratja ntelalhitjika. Itja drunk-erritjika, ntaiyawutjika

turta. Itja korna mpaaritjika, relha arrpunhaka noalela turta intitjika. Itja turritjika, arrpunhaka antjakunyerritjika turta. <sup>14</sup> Rrangkarra kala Ingkarta Jesua Krista ekuranta eterrai, ekura turta kangkwerrai, itja lherrintja korna rrakangkar-ranhaka.

## 14

*Tjina unkwanganha, erala Ingkartanha itja ekarlta inthorra tnakama, unta erinha itja lolowutjika*

<sup>1</sup> Thunga tjina tnakanhakanha rrakangkar-ranhala itja Ingkartanha ekarlta inthorra tnakama. Rrangkarra ekura kalantema kangkitjika. Rrangkarra turta itja ekuralela palkala iwurritjika. <sup>2</sup> Arai, arrpunhala etarlarama nhanha marra namanga karalka ilkutjika. Arrpunhala pula, erala Ingkartanha itja ekarlta inthorra tnakama, era marnantala ilkuma. <sup>3</sup> Relha erala kara ilkuma, era itja relha erinha lolowutjika, erala marnanta ilkuma. Relha era turta, erala marnanta ilkuma, era itja relha erinha lolowutjika, erala kara ilkuma, Altjirranha tjina ekura namanga warta. <sup>4</sup> Arai, unkwangathaka itjama nama relha arrpunhaka urrkapunhapunha ilitjika era paala ntelalhamanga. Nhanha itornka ekuranhakathaka nama. Lakinha ngerra, unta itja Altjirraka tjina arrpunha ilitjika era paala ntelalhamanga. Altjirrala kala erinha ilitjina. Altjirrala turta erinha errkuma, era paalakarlakerrakitja.

5 Relha nyinta angkama arlta nyinta tjiparralkura namanga Altjirraka urrkurrkintja nitjika, arlta arrpunha ntjarrangatjina. Kanha relha arrpunha angkama arlta ingkarraka loala tjiparra namanga Altjirraka urrkurrkintja nitjika. Arai, arlta untala etarlarama tjiparralkura namanga, kala ekurala Altjirraka urrkurrkintja nai. Nhanha kala marra nama. 6 Relha erala angkama arlta nyinta tjiparralkura namanga, era lakinha angkama Ingkartanha etarlaramala. Relha erala kara ilkuma, era kara ilkuma Ingkartanha etarlaramala, era Altjirranha karaka dangkilamanga warta. Relha erala marnanta ilkuma, era marnanta ilkuma Ingkartanha etarlaramala, era Altjirranha marnaka dangkilamanga warta. 7 Arai, nurna itja nurnakiltja etatha nama. Nurna turta itja nurnakiltja iluma. 8 Nurna paka etatha namanga, nurna Ingkartaka etatha nama. Nurna paka ilumanga, nurna Ingkartaka iluma. Lakinhanganga nurna paka etatha namanga, nurna paka ilumanga, nurna Ingkartaka tjina kuta nama. 9 Nhanhakakwa Kristanha ilukala, wotha kamerrakala turta, era relha errilngaka, relha etathaka turta Ingkarta nitjinanga.

10 Iwunhangama unta tjina tnakanhakanha unkwanganha ilama era paala etarlaramanga? Iwunhanganga turtama unta erinha lolowuma? Arai, nurna ingkarraka anma Altjirrange urlarra itnatjina, era turta nurnanha tjiperrawutjina.

11 Altjirraka Angkatja Imankinyala ilama,

“ ‘Yingala etatha namanga ngerra,’

Ingartanha angkama,  
 ‘relha ingkarraka nukanga urlarra mparalela  
 arrarnalhitjina.  
 Relha ingkarrakala turta yinganha  
 tnantjitjina.’ ”

<sup>12</sup> Nurnaka ingkarrakakathaka nitjina, anma  
 Altjirra ilalhitjika.

<sup>13</sup> Lakinhang nurna itja wothe ilarritjika,  
 “Unta paala etarlarama.” Nurna pula aral-  
 hitjikatitja, nurna tjina tnakanhakanha nur-  
 nakanha parrpartilakitja. <sup>14</sup> Yinga kaltja Altjir-  
 rala itja kara, marna nyinta paka parrakala. In-  
 gkarta Jesuala yinganha nhanha ilaka. Arrpun-  
 hala pula etarlaramanga Altjirrala kula kara ar-  
 rpunha parrakala, era itja kara nhanha ilkutjika.  
 Nhanha ekura itja marra nama.

<sup>15</sup> Unta paka kara ilkumala tjina unkwang-  
 ganha parrpartilamanga, unta itja tjina unkw-  
 wanganhaka kangkintja ntelalhama. Arai,  
 unta itja tjina unkwanganha kornilitjika, kara  
 ilkumala. Kristanha kunha ekura ilukala.

<sup>16</sup> Arai, unkwangathaka kala nama kara  
 ilkutjika unta antja namanga. Unta pula  
 tjina unkwanganha kornilamanga, kara ilku-  
 mala, kurunga arrpunha ntjarrala Yia Marra  
 erinha lolowutjina. <sup>17</sup> Arai, Altjirranha nur-  
 naka Ingkarta namanga, era itja nurnanha  
 kariperra, ntjuntjiperra paka turnama. Era  
 pula nurnanha ilama, “Rrangkarra nukanga  
 urlarra arratja nama. Yinga rrakangkarra ril-  
 herana nama. Arrkana narrirrai Enka Alkngaltara  
 era rrakangkarralela namanga.” <sup>18</sup> Relha erala  
 nhanhaka etarlaramala Kristaka kangkwerrama,



ekura Altjirranha kangkama. Arrpunha ntjarra turta ekura kangkitjinantema.

<sup>19</sup> Lakinhangha nurna kutatha thakerritjika tjina tnakanhakanha nurnakanhalela rilhera nitjika, erinha ekarltilitjika turta. <sup>20</sup> Arai, Altjirrala erinha kala inaka tjina ekura nitjika. Untantama erinha itja parrpartilitjika, kara ilku-mala. Marna pa kara ingkarraka kala marra nama. Unta pula itja kara ilkutjika, nanhala tjina tnakanhakanha unkwanganha parrpartilamanga. <sup>21</sup> Nhanha marralkura nama unta karalka, wine-alka kala imputjikanta, etna paka erinha Kristanga ilknagakamanga. <sup>22</sup> Unta kala kaltja nhanga karalka ilkutjika nhanha marra nama. Nhanha pula kala Altjirra mpalakanta niai.

Tnakanhakanha erala karalka ilkuma Altjirranha ekarlta tnakamala, era kala arrkana nama. <sup>23</sup> Kanha tnakanhakanha erala karalka ilkuma, Altjirranha itja ekarlta tnakamala, era kornilalhama. Iwunhangha? Era kara ilkumanga, era etarlaramangatanya Altjirrala nhanha par-rakala. Relhala pula Altjirranha ekarlta tnakamala karalka ilkumanga, nhanha kala marrala nama.

## 15

<sup>1</sup> Nurna Altjirranha ekarlta tnakama. Tnakanhakanha arrpunha ntjarrala pula erinha itjala ekarlta inthorra tnakama. Nurnantama etnanha itja palkala rrankalhelitjika, etnakanga alknghatharra karalka paka ilkumala. Nurna

itja ntelalhitjika nurnala antja namala ngeranta. <sup>2</sup> Nurnataka etnakiperra turta eteritjika. Nurna turta etnaka tangitjala nitjika, Altjirranha ekarlalkura tnakitjika. <sup>3</sup> Arai, Kristanha itja ntelalhaka erala antja namanga ngerra. Altjirraaka Angkatja Imankinyala nhanga ilama, “Altjirrai, lenha ntjarra etnala nganha arrampowutjika nakala, etna kunha yinganhaititja arrampowuka.” <sup>4</sup> Arai, etna kunha Altjirraaka Angkatja Imankinya intalhelakala nurnanha kaltjinthitjika. Nurna turtantama kunpa, tnoatnoa Jesua Kristaka kaaralhitjinanga.

<sup>5</sup> Altjirralla kunha rrangkarranha irrpalthala kunpakunpilama, tnoatnoilama turta. Yingtamtama ekururna ingkama, era rrakangkarra tangitjala nitjika, rrangkarra urlarrakurlarra rilhera ntelalhitjinanga, Jesua Kristala nurnanha turnakala ngerra. <sup>6</sup> Kurunga rrangkarra Altjirranha, Ingkarta nurnaka Jesua Kristaka Kaartanha, porta kuta tnantjitjina.

<sup>7</sup> Rrangkarra urlarrakurlarra kangkintja ntelalhitjika, loala kuta, Kristanhala rrakangkarra kangkakala ngerra. Lakinha rrangkarra Altjirranha tnantjitjina. <sup>8</sup> Arai, Kristanha kunha pitjika relha Jew ntjarranha tangkahlelitjika, Altjirralla errilngipata etnanha lhelakala ngerra. Lakinha Altjirralla relha Jew ntjarranha ntelaka era itja orrtjerramanga. <sup>9</sup> Kristanha turta pitjika, Relha Lorinya ntjarralla Altjirranha tnantjitjinanga, era etnaka montjamontja ntelalhakalanga. Nhangha Altjirraaka Angkatja Imankinyala ilama,

“Nhanhakakwia atha nganha tnantjitjina Relha Lorinya ntjarranga mpopala, atha nganha inthorrakwia tnantjitjina.”

<sup>10</sup> Altjirraka Angkatja Imankinya arrpunhala ilama,

“Relha Lorinya ntjarrai, Altjirraka worlalela arrkanerrai.”

<sup>11</sup> Wotha Altjirraka Angkatja Imankinya arpunhala ilama,

“Relha Lorinya ntjarrai, Altjirranha tnantjai. Kala relha ingkarrakalanta kuta Altjirranha tnantjitjika.”

<sup>12</sup> Isaijah-ala turta ilaka,

“Jesse ekura worra katjia alknngerritjina. Erantama Relha Lorinya ntjarraka tjitjarterritjina. Etna turta kaaralhitjina era etnanha tangkalhelitjika.”

<sup>13</sup> Yingantama Altjirra ekurna ingkama, erala rrangkarranha irrpalthala kaltjinthama ekura kunpa kaaralhitjika. Yinga ingkama era rrangkarranha arrkana inthorrlitjika, era turta rrangkarranha wothamawotha ilitjika era rrankangkarra rilhera namanga. Yinga turta Enka

Alkngaltara ekarlturna ingkama, era rrangkar-ranha tnoatnoa inthorrilitjika, rrangkarra Jesua Kristaka kaaralhamalanga.

*Paul-anha urrkapuntja ekuranhiperra ilalhaka*

<sup>14</sup> Tjina ntjarrai, yinga kaltja rrangkarra relha ilporatha namanga, Altjirraka angkatjaka kaltja turta. Rrangkarra turtantama Altjirraka angkatja irrpalthala ilarrama. <sup>15</sup> Pepa nhanhala pula atha rrangkarranha kalantema alkn-gatharra ngerra ilaka, nhanga rrangkarranha ilpangkalhelitjika. Nhanha kala nukathaka nama, Altjirranha nuka ngwanga ntelalhamala <sup>16</sup> yinganha urrarakalanga Krista Jesuaka urrkapunhapunha nitjika. Era turtantama yinganha urrpia yairnaka Relha Lorinya ntjarrurna, etnanha Altjirraka Yia Marra ilitjika. Relha Lorinya etna turtantama Altjirranga urlarra yalknga nitjinanga, Enka Alkngaltarala etnanha alkngaltartilakalanga.

<sup>17</sup> Yingarrpa pula yarna tnakalhama. Krista Jesua erataka yinganha ekartilaka. <sup>18</sup> Lakinhanganya yinga kala lenhiperranta angkitjina, Kristanhala nukarlarlanga urrkapukala. Era Relha Lorinya ntjarranhanha kangkwerritjika kaltjinhaka, nukarlarlanga. <sup>19</sup> Enka Alkngaltarala yinganha ekartilakalanga, atha tjtatikartalka urrkapuka. Athantama Jerusalem-angatjina Yia Marra Kristiperra kaltjinhaka, pmara Illyricum-akurtitja. <sup>20</sup> Yinga pula relha lenha ntjarrurna lhaka, etnala itjantema Kristiperra wukala. Yinga itja antja naka relha lenha ntjarranhanha kaltjinhitjika,

etnanhala arrpunhala kala kaltjinthakala.  
 21 Nhangal Altjirraka Angkatja Imankinyala  
 ilama,

“Relha etnanhala arrpunhala itjantema  
 ekuriperra ilakala, etna ekuriperra  
 wutjina.

Relha lenha ntjarra etnala itjantema  
 ekuriperra wukala, etna ekuriperra  
 kaltjerritjina.”

*Paul-anha ilalhaka era Rome-urna yatjarra  
 lhitjika antja namanga*

22 Lakinhangal yingal lyartalpula yarna  
 rrakangkarrurna lhaka, atha relha arrpunha  
 ntjarranhal kaltjinthamanga. 23 Lyarta  
 pula atha urrakapuntjal nhanhal kala  
 mangkilakantama. Arai, yingal nhangal  
 arrkurlantema rrakangkarrurna yatjarra lhitjika  
 antjal nakala. 24 Yingantama kala pitjitjika  
 eterrama, yingal pmara Spain-urna lhamalanga.  
 Yingal turta antjal nama rrakangkarralela  
 kurrkal wara nitjika. Kurungal rrangkarrantama  
 yinganhal marnakarta, money-akarta turta paka  
 twapanthitjinanga.

25 Lyarta pula yingal Jerusalem-urnarrkal  
 lhama, money-akarta, worlamparinyaka.

26 Worlamparinyal ntjarra pmara Macedonia-  
 ala, pmara Achaia-ala turta antjal naka  
 money kotjitjika, tnakanhakanhal ilknagara  
 ntjarraka, Jerusalem-ala. 27 Etnarrpa antjal naka  
 money nhanhal kotjitjika. Nhanhal turta pula  
 etnakathaka naka. Iwunhangal? Relhal Lorinya

ntjarrala Yia Marra erinha relha Jew ntjarranga wukalanga. Relha Lorinya ntjarrakathakantama nama relha Jew ntjarranha kapanha pelitjika. <sup>28</sup> Money nhanha impanka kuta Jerusalem-aka iwurlalpumala, yinga kala tjaiyakerritjina, Spain-urnathaka. Yinga turtantama rrakangkarralela yatjarra nanhitjina. <sup>29</sup> Yinga kaltja yinga rrakangkarrurna pitjimalanga, Kristala rrangkarranha, yinganha turta, kngarra lyekarrilitjina.

<sup>30</sup> Tjina ntjarrai, yinga rrakangkarra ngkangkawulhama nukalela, nukakwia turta, Altjirurna ingkai, Ingkarta Jesua Kristarlarlanga. Rrangkarra turta nukakwia ingkai, Enka Alkngaltara era nurnanha kaltjinthakalanga urlarrakurlarra kangkintja ntelalhitjika. <sup>31</sup> Altjirurna ingkai, era yinganha ntarntaritjika relha Judea-arilya ntjarranga, etnala Jesua Kristanha ilpoiwuma. Rrangkarra turta ekururna ingkai, Jerusalem worlamparinya etna money ekura kangkitjinanga, money nhanga athala etnakurna kngama. <sup>32</sup> Kurunga, Altjirranha antja namanga, yinga rrakangkarrurna arrkana inthorra lhitjina, rrakangkarralela yatjarra nitjika. <sup>33</sup> Altjirra erala nurnakalela rilhererrakala, era rrakangkarralela kuta nama. Amen.

## 16

*Paul-ala tjina ekuranha ntjarranha anparnaka*

<sup>1</sup> Arrkutja nyinta rrakangkarrurna lhitjina, rretnya Phoebe. Era tjina tnakanhakanha nama.

Era turta worlamparinyaka tangitjala nama, Cencrea town-ala. <sup>2</sup> Erinha tjina tnakanhakanha ngerra inai. Nhanha kala rrankangkarathaka nama, rrankarra turta tnakanhakanha namangantema. Rrankarra turta ekura tangitjala nai, erala ntjarraka, nuka turta, tangitjala nakala ngerra.

<sup>3</sup> Atha Priscilla Aquila tharranha anparnama. Noarta eratharra kunha nukalela urrkapuka Krista Jesuakakwa. <sup>4</sup> Arrpunharanga eratharra kala nukakwa ilutjika nakala. Yinga eku-ratharra kuta ilpangkama. Itja yinganta pula. Relha Lorinya ntjarra arrpunha turta, etnala Kristanha tnakama.

<sup>5</sup> Atha turta worlamparinya etnanha anparnama, etnala iltha ekuratharrakanhala pepaka worlerrama.

Atha artwa Epenetus-anha anparnama. Era tjina kangkintja inthorra nama. Erakimparra kunha Kristanha tnakakala, pmara Asia-ala.

<sup>6</sup> Atha Mary-anha anparnama. Era kunha rrankangkarra kngarra inthorra urrkapukala.

<sup>7</sup> Atha Andronicus, Junias tharranha anparnama. Noarta eratharra Jew nama, yinga ngerra. Eratharra nukalela jail-ala nakala. Eratharra apostle ilporatha nakala. Eratharra turta nukanga arrkurla kuta Kristanha tnakakala.

<sup>8</sup> Atha artwa Ampliatus-anha anparnama. Era tjina tnakanhakanha kngarra nukanha nama.

<sup>9</sup> Atha artwa Urbanus-anha anparnama. Era tjina urrkapunhapunha Kristaka nama.

Atha artwa Stachys-anha anparnama. Era tjina kngarra nukanha nama.

<sup>10</sup> Atha artwa Apelles-anha anparnama. Era Kristanha ilporatha inthorra tnakama.

Atha artwa Aristobulus-aka ramarama anparnama.

<sup>11</sup> Atha artwa Herodion-anha anparnama. Era artwa Jew nama, yinga ngerra.

Atha tnakanhakanha lenha ntjarranha turta anparnama, etnala artwa Narcissus-aka ramarama namanga.

<sup>12</sup> Atha arrkutja Tryphena, Tryphosa tharranha anparnama. Eratharra kunha Inkartaka kngarra urrkapuma.

Atha arrkutja Persis-anha anparnama. Era turta Inkartaka kngarra urrkapukala. Yinga ekura kngarra kangkama.

<sup>13</sup> Atha Rufus-anha anparnama, artwa Inkartala urrarakala. Atha mia ekuranha turta anparnama. Era nuka turta mia ngerra ntelalhakala.

<sup>14</sup> Atha artwa Asyncritus, Phlegon, Hermes, Patrobas, Hermas ntjarranha anparnama. Atha turta tjina tnakanhakanha etnakalela namala ntjarranha anparnama.

<sup>15</sup> Atha artwa Philologus, Julia tharranha anparnama. Atha Nereus-anha anparnama, tjia ekuranha turta. Atha arrkutja Olympus-anha anparnama, relha alkngaltara ntjarranha turta, etnala iltha ekuranhala pepaka worlerrama.

<sup>16</sup> Nyintaminyintala tjina tnakanhakanha ekuranha tjia ngerra kwakitjikitjika.

Kristaka worlamparinya ingkarrakala rrangkarranha anparnama.

*Paul-ala etnanha nyintaranga wotha tjabatuka*



<sup>17</sup> Tjina ntjarrai, atha rrangkarranha tjatjatumama. Rrangkarra relha lenha ntjarranga aralhitjika, etnala worlamparinyanha tjalpalhelama. Etna turtala tnakanhakanha ntjarranha parrpartilama, etnanha paala kaltjinthamala. Etnakanga kala tjanantalhai! <sup>18</sup> Relha etnala rrangkarranha lakinha kaltjinthama, etna itja Ingkarta nurnakanha, Kristanha, etarlarama. Etna tnarta etnakanhanta etarlarama. Angkatja inangkarla kula angkamala, relhaka turta kula kangkamala, etna relha kornakorna ntjarranha parrpartilama. <sup>19</sup> Relha ingkarraka pula kaltja rrangkarra Ingkartaka kangkwerramanga. Lakinhanganga yinga arrkana nama. Yinga antja rrangkarra nhanhakanta kaltja nitjika, marra ntelalhitjika. Kanha korna ntelalhitjika, nhanhaka rrangkarra kotnala nitjika.

<sup>20</sup> Arai, Altjirra erala nurnakalela rilhererrakala, era inguntha wara Satan-anha ingkala rrothitjina ngerra.

Ingkarta Jesuanha rrangkarra kuta ngwanga ntelalhama.

<sup>21</sup> Timothy, tjina urrkapunha nukanha, era rrangkarranha anparnama. Artwa Lucius, Jason, Sosipater etna turta rrangkarranha anparnamantema. Yinga ngerra, etna turta relha Jew namantema.

<sup>22</sup> Atha, artwa Tertius-ala, pepa nhanha intalhelaka. Atha turta rrangkarranha anparnama. Rrangkarra ngerra, atha turta Ingkartanha tnakama.

<sup>23</sup> Gaius-ala rrangkarranha anparnama. Yinga iltha ekuranhala yatjarra nama. Worlamparinya turta iltha ekuranhala pepaka worlerrama.

Artwa Erastus, erala town nhandaka money ntarntarama, era rrangkarranha anparnama. Tjina arrpunha nurnakanha, artwa Quartus-ala, rrangkarranha anparnamantema.

*Paul-ala Altjirranha tnantjaka*

<sup>25</sup> Altjirranha tnantjai! Era rrangkarranha irrpalthala ekarltilama, rrangkarra Yia Marra erinha tnakamanga. Atha nhanga rrangkarranha Yia Marra Jesua Kristiperra kaltjinhaka. Yia Marra nhandaka erinha kunha Altjirrala imankangatjina lauwukalarrka. <sup>26</sup> Lyarta pula Yia Marra erinha kala relha ingkarrakanha ilamantama, Altjirra urrpia imankinya ntjarraka angkatjarlarlanga. Altjirra, erala ngampakala etatha nama, erarrpa turnaka Yia Marra erinha relha ingkarrakanha ilitjika, etna erinha tnakitjinanga, ekura kangkwerritjinanga turta. <sup>27</sup> Altjirra nhandaka eranta inangkarla nama. Nurna erinha ngampakala tnantjitjika, Jesua Kristarlarlanga. Amen.

**Altjirraka angkatja - Arrarnturna  
kngartiwukala  
The New Testament in the Western Arrarnta  
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 11 Nov 2022 from source files dated 22 Nov 2019

e7dac67a-727e-547f-9edb-55e6c28bb3b9